

Redzuun Rexpejn̄ Dios

Siääd Sprit Dxan xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluü Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejn̄pacni. Sprit Dxan xten Dios baluü Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubañsacni lo rebeñgut, baluilojni lo rexpejn̄pacni. Tiuu dxej baluilojni loj rexpejn̄pacni balti huält te gacbeereni agubañsacni. Guniizani lojreni xcuent xcälrnibee Dios.

⁴ Che gudejd tiuu dxejga, batojp Jesucrist rexpejn̄pacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpni:

—Dee abiejn diajgtu guniä lojtu. ⁵ Juan batiobnis con nis, luxh ñaj guxii dxej cayäädx dxejcru siääd Sprit Dxan xten Dios te cuääzni neñ lastootu. Si'c guirobnistu —räjpni.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La ñaj gudedsaclu yälrnibee lo rexpejn̄ Israel, ä?

⁷ Dxejcti räjp Jesucrist loj rexpejn̄pacni:

—Di riäjł gacbeetu xcuent redxej nājza retiemp nani abasobxгаа Dios con xcälrnibeeni. ⁸ La'tu sica'tu yälrnibee che abiääd Sprit Dxiān xten Dios neñ lastootu. Dxejc chatie'chtu xtidxä nājza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, nājza neñ guideb guedxliuj —räjpni.

⁹ Gulujxtis gunii Jesucrist rediidxga, luxh lałni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn nuhuii lojni. ¹⁰ Lałni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni. ¹¹ Dxejc räjp reangl loj rebejn:

—¿Xhi rajctu ben Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni najc apostcoob

¹² Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni. ¹³ Che biu'reni Jerusalén, bidzujñreni ro' yu' cadro rbäzlaareni. Yu'ga najc jiaa yejc stee yu'. Ro'c rbäzlaa Pedr nājza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, nājza Judas bejtz Jacob. ¹⁴ Ro'c yu' guiraareni nājza regunaa nājza Marii xnan Jesucrist nājza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajł bejn. Dxejcti huisulii Pedr galäiireni, räjpni loj rebejn:

16 —Caniä lojtu, resa'ä, nanabpac soob xtidx Sprit Dxaan xten Dios ni bacuaa toDavid lo guijtzcuent Judas, nani bato' Jesucrist loj renani gunaazni. 17 Gujcc Judas sa'nu, bejnzani lagajc dzuun ni biennu. 18 Cua' Judas meel ni badeedreni lojni che bato'ni Jesucrist. Che gulujc bejnne dzunguidx ni bejnne, badesacni meel lojreni. Gusiireni te la' yuj. Dxejcti lagajc Judas basäl duu guejnne, guzäbnajlne lo bej, gujtni. Gusaguijnne, dxejcti biräjs xque'ni birii guiraa reziini. 19 Che biejn diajg rebejn Jerusalén si'c, gulälajreni yujre Acéldama, ni säloj yurejn. 20 Neñ guijtzc ni laa Salmos abacuaa toDavid rediidxre:
Sujianxteb rolijzne;
na'c cuääzru bejn rolijzne;
näjza:

Suxca'za ste'ca niguii xtzuunni.

21 Naj nanab cuenu stee niguii —räjpc Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, 22 dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäjniguiire nuunu gusule'nu diidx gubansacpac Jesucrist lo rebengut.

23 Dxejcc gulääreni tiop niguii lojreni, tejni laa José Barsabás ni rbälajreni Justo, steeni laa Matías.

24 Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, 25 te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

26 Dxejcti gudzujtreni daad te gulereni lo guiro'preni. Che biajb daad, gulereni Matías.

Dxejc bigabnäj Matías stzubiteeb reapost te gujcreni tzubitio'p apost.

2

Biääd Sprit Dxan xten Dios

¹ Che bidzujñ dxej ni rajc lanij xten Pentecostés, tre' guiraareni tejsi lajt nen te yu', ² chela gusloj cayubej xhaguibaa si'c te beroduxh, bachajni guideb nen yu' cadre suga'reni. ³ Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴ Biu'ti Sprit Dxan xten Dios nen lastoo guiragajcreni. Dxejc gusloj canii ireni garen-garen didxsaj si'ctisni badeed Sprit Dxan xten Dios guiniireni.

⁵ Nen redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siädreni. ⁶ Che biejn diajgreni guyubej beduxhga, bidojp reben xhidaalga, bachaag sa'reni. Rdxeloduxh reben xhidalg sa'csi cayejn diajgreni canii reapost xtidxsajpac cade tejreni. ⁷ Cadxelojreni räjpreni:

—¡Bahuilaare! ¿La et beñ Galileedi renani canii, ä? ⁸ ¿Xhoxh riejn diajgnu caniiireni xtiidxpacnu si'ctis ni rniinu laadxnu, ä? ⁹ Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. ¹⁰ Najczanu beñ distrit Frigia, beñ estad Panfilia, beñ nación Egipto, näjza beñ ni siäd stelaad Cirene, te estad nen Africa. Loj rebejn ni siäd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. ¹¹ Yu'za

beṅ Creta. Yu'za beṅ nacióṅ Arabia. Guiragajcnu rieṅ diajgnu caniireni xtiidxpacnu si'ctis ni rni-inu laadxnu. Caniireni loonu xcuent recosroduxh ni cayujṅ Dios.

¹² Bidxeloduxh rebeṅ xhidaalga, dijieṅ xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebeṅ ni baxhiznäjäreni, räjpreni: —Agusojz redee.

Gunii Pedr loj rebeṅ

¹⁴ Dxejcti gusulii Pedr näjza tzubiteeb sa'ni, guredxa'ni guniini lo rebeṅ xhidaalga:

—Guejbtu, rexpeṅ Israel, nani rbäjz distrit Judea näjza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räjpreni Dios:

Sidzujṅ dxej che guxhalä Xsprit Dxaṅä cuääzni neṅ lastoo guiraa rebeṅ.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcaṅ, rextadgoldootu suluiloj bacalṅ recos nani guluiä lojreni.

¹⁸ Guxhalä Xsprit Dxaṅä loj guiraa reni siädnaṅ narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäjy loj gubijdx, sajc bäii si'c rejn.

Sajc guiraa recosre,
dxejcru sidzujñ dxeduxh che jiälsacä narä, Dios.

²¹ Dxejc guiraa rebejn nani cueedx guiniab gacnäj
Diosreni, reni'c siliaa lo dojl.

²² Räjpedr lojreni:

—Rexpejn Israel, colcuadiajg xtidxä. Dios baluui
Jesucrist, beñ Nazare't, lojtu por recosro, remi-
lagwr, reseen nani bejnne nez lojtu. Lagajc Dios
badeed yälrnibee loj Jesucrist te bejnne redzun-
roga. La'tu nancheetu dee. ²³ Galooli ananchee
Dios xhi guntu loj Jesucrist Xi'nni. Basaanza
Dios bateedtu Jesucrist ladzñaa rebeñgijdx te
bacuaareni Jesucrist lo cruz te bagu'trenini.

²⁴ Baspañsac Dios Jesucrist, baslaa Diosni ladzñaa
yälgujt, sa'csi di niajcdi nica' yälgujtni par tejpas,
sa'csi laani rnibee lo yälgujt. ²⁵ Che gubañsac Jesu-
crist, guzojb diidx ni bacuaa David lo guijtzc xcuent
Jesucrist. Räjpedr David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb
lastoä.

²⁶ Ni'cni bibalajz lastoä, guniäza lojlu lacti rbaa
lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibañä par tejpas.

Sibalazduxhä sa'csi guibaññää luj,
si'c räjpedr David xcuent Jesucrist.

²⁹ Räjpedr:

—Guyasi guiniä lojtu agujc xchero gujt David.
Aguyutzu'tzni neñ baa. Sajc guihuiinu baa cadre

biga'tz David. ³⁰ Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. ³¹ Sa'csi baluixгаа Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut. ³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahui-itu, nani cayejn diajgtu nadxej. ³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä ³⁵ che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ 'Rniliäpac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpeñ Israel, abejñ Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruzj, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlajztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu. ³⁹ Si'c rlajz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj

guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcrú gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ mil bejn.

⁴² Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

Xho gubajn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr. ⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni neñ guidoro xten Israel. Tejsi najc rexhigabreni. Gudaunäj sa'reni rolijz cadetejreni, guiraareni bibalaznădúxh sa'reni. ⁴⁷ Gulă'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojreni, dxejc bachaagreni lo rexpejn Jesucrist.

3

Biajc niguii nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rcachon gudxej. ² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan nen guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjɔ Pedr lojni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjɔ Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusulii! ¡Gusaj! —räjɔni.

⁷ Dxejcti gunaaz Pedr naani, guläsnini. Bili-gajc ni'ni, gusutijp ni'ni. ⁸ Huisuyälni, gusajni. Biunäjni Pedr näjza Juan nen guidoro. Rsiajni, rtiäsnini, calä'pni xpala'n Dios. ⁹ Bahuii xhidajl bejn lojni nen guidoro, rsiajni, calä'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxelo-duxhreni bahuiireni xhi gusajc niguii ni gucxhuu ni'ni.

Baluii Pedr xtidx Dios nen cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, nasztu'tz niguiiga naareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejn räjɔni lojreni:

—¿Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcäl̄rnibee Jesucrist bi-ajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yäl̄rnibee loj Xi'nni Jesús. Niluxh la'tu bateed-tuni ladzṇaa reguxhtis. Che rļajz Pila't ni rnibee nuslaa Jesucrist, ditu nicäjb niriini, alga guniyaj-tuni nez loj Pila't. ¹⁴ Niluxh la'tu baro'ntu Xi'n Dxa xten Dios nani rujn ganax dzunsa'c. Alga gun-abtu birii te niguii nani bagu't bejn. ¹⁵ Jesucrist rudeed yäl̄nabajn, luxh la'tu gunabtu bacuaareni Jesucrist lo cruzj. Gulässac Dios Jesucrist lo re-beṅgut. Bahuiloonu nabajn Jesucrist, najcnu testi-igw gubansac Jesucrist lo rebēgut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcäl̄rnibee Jesucrist abasiajcniguiire, sa'csi huililajzni. Sa'csi huililajznu xtidx Jesucrist, ni'c biajcnite najcni si'cni rhuiituni ṇaj.

¹⁷ 'Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruzj. ¹⁸ Scree gujc te guzojb xtidx Dios ni cuaj lo gujtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni col̄siechlajztu, col̄guibi' loj Dios te guibicaj xtojltu. Dxejc susiälyuj Dios las-tootu, sujnni gac nacoob guira'ti, si'cni bia'n di-idx gacni. ²⁰ Lojtu suxhalza Dios Jesucrist nani rnibee, nani aguleni galooli. ²¹ ṇaj nungäj̄l jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu

agujc xchero. ²² Scree gunii toMoisés lo retoxtad-goldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexpejn Dios.”

²⁴ Räjpa Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnajlni, xcuent recos ni cayajc nen redxeyre. ²⁵ La'tu najc xajg reniguii ni gunii xtidx Dios. La'tu biannäjtü diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl te xajglu ni guspalduxh reben guedxliuj, sa'csi suslaanireni lo dojl.” ²⁶ Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

4

Baluu Pedr näj Juan xtidx Dios loj reguxhtis

¹ Laļ ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos. ² Bidxe'chduxhreni sa'csi cagulijdxreni rebejn, cayäjpreni:

—Sibaṅsac rebejn lo rebengut sa'csi gubaṅsac Jesucrist lo rebengut.

³ Gunaaz reguxhtisreni, biäuren i sa'csi agudxey luxh abiäu jusgaad. Nen latzguiib bararen i yääl. ⁴ Xhidajl reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii leii, ⁶ näjza Anás ni rnibee guiraa rebixhojz, näjza xpagojz ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee. ⁷ Gunibeereni biääd Pedr näjza Juan gusuj galäiireni te gunabdiidxreni lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxaan xten Dios nen lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel, ⁹ palga canabdiidxtu xhicuent gucnäjnu niguii nani gucxhoo ni'ni, palga canabdiidxtu xho basiajcnu niguiiga, ¹⁰ gusule'nu xcuent dee te gacheetu te gacheeza guiraa rexpejn Israel. Xtidx Jesucrist najc yälrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruju, niluxh Dios gulänsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'. ¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjp Pedr.

¹³ Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guituju. Dxejcti räjp rebixhojz ni sajcro lo sa'reni:

—Direni ganduxh guijtz, bejntisreni.

Dxejcti gucheereni gusanäj redee Jesucrist, lojni bisieedreni. ¹⁴ Bahuiiza rebixhojz lo niguii

ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶ Räjpreni lo sa'reni:

—¿Xhi jiennänu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni. ¹⁷ Per te di guire'ch xtidx Jesucrist ste'ca guejdx, do'o gulidxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcru guicuaadi-aagnu? ¿Xtiidx la'tu, o xtiidx Dios? ²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajcreni xcuent yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che bas_laa rebixhojz guiro'preni, gubi'reni lo sa'reni ni najc rexpejn Jesucrist. Bijreni di-idx guiraa ni gunii reguxhtis xten rebixhojz nājza rebeṅgool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rājpreni:

—Xtadnu Dios, nani benchee xhaguibaa nājza guedxliuj nājza nisdoo nājza guira'ti ni yu' lojreni, neṅreni, ²⁵ nani bejn basoob toDavid xtidx Sprit D_xan te bacuaani xtiidxlu, rājpnri:

¿Xhicuent guyuduxh reben_u guedxliuj yārsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj nājza reguxhtis xten reguejdx te gudxojnreni xtzun Dios nājza xten Dad Crist nani baxhal_u Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes nājza Poncio Pila't nājza rexpejn Israel nājza reben_uzijt nani di gac xpejn Israel. Bidxechnājreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac.

²⁹ Naj Guejblu Xtiosnu, bahuii xho cagusacsireni nuure, gucnāj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu.

³⁰ Baniidx xcāl_rnibeelu loonu te guisiajcnu rebejn, te jienzanu redzunro, remilajgwr con xcāl_rnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadro tre'reni, cayac si'c te xu. Dxejcti biāād Sprit D_xan xten Dios basutijpruni las-tooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojp xyujni, rolijzni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5*Ananías näj chäälni rujn dojl*

¹ Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo reben dxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni

cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷ Pet agujc choñ or gujtni chela bidzujñ chääl Ananías. Dini gan agujt chäälñi. ⁸ Räjñ Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjñ Safira lojni:

—O'n, si'c huijni.

⁹ Dxejcti räjñ Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlanjtu gusgueetu Sprit Dxaan xten Dios? Ro lä' siääd renani huicua'tz chäällu. Naj näjza luj chacua'tzreni neñ baa.

¹⁰ Si'ctis biajb Safira, gutgajczani. Dxejcti bidzujñ rebi'n, bahuiireni agujtñi. Dxejcti guläsrenini, biriireni huicuatgajcnenini cuä' baa cadre biga'tz chäälñi. ¹¹ Bidxebduxh guiraa rexpejn Jesucrist, näjza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón. ¹³ Guyu' xhidajl bejn ni di nuchaag lo rexpejn Jesucrist sa'csi bidxebbreni guchaagreni

lojreni. Reben_guejdxga guläpduxh_{re}ni xpala'n rexpej_n Jesucrist. ¹⁴ Nen redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulää_{re}ni lo nezyuj rebejn nani cayacxhuu. Siäd_{nä} rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzuj_n xhidajl rebejn ni siäd ste'ca guejdx. Biäd_{nä}re_{ni} rebejn ni cayacxhuu näjza balti bejn ni yu' ben_dxab nen lastooreni. Con xcäl_rnibee Jesucrist basiaj_c reapost reben_r racxhuu, gulää_zareni reben_dxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p reben_guejdx xpala'n reapost sa'csi basiajcreni reben_r racxhuu. ¹⁸ Gunaazreni reapost. Basä_urenini nen_r latzguiib. ¹⁹ Niluxh yäälga, biäd te angl xten Dios, baxhalni ro' latzguiibga. Dxejcti gulää_{ni} reapost nen_r latzguiib. Räj_pni lojreni:

²⁰ —Colchäj guidoro. Ro'c col_guinii lo rebejn xho gac guiban_{nä}jreni Dios par tejpas.

²¹ Che biejn diajg_{re}ni si'c, rsildooru biu'reni nen_r guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jädnä reguixhajg reapost nani biäu nen_r ladtguiib. ²² Che bidzuj_n reguixhajg latzguiib, bahuii reguixhajg nen_r latzguiibga, niluxh rut yu'di nen_r latzguiib. Che gubi'reni biäd_{nä}re_{ni} diid_x, räj_preni loj reguxhtis:

23 —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

24 Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjp lo sa'reni:

—¿Xhini'c gujc? ¿Xhoni gac naj? —räjpreni.

25 Dxejcti bidzujn te niguii, räjpni lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —räjpreni.

26 Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaarení guij yejcreni. 27 Che bidzunnäjreni reapost, räjpreni suurení nez loj reguxhtis xten Israel, sas gunii bixhojz ni rnibee, 28 räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlajztu cuaquijtu nuure bagu'tnu Jesucrist.

29 Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. 30 Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsni lo rebengut. 31 Naj agule'c Diosni xlad-beeni cadre rnibeeni, abadeedza Dios yälrnibee loj Jesucrist te guslaani nuure, te si'c rlajzni guibicaj xtoj guiraa rexpejn Israel nani gusiechlajzreni. 32 Bahuiloonu xhi bejn Dios. Ni'c cagusule'nu.

Nadoncheenu Sprit Dxi xten Dios cayacnä j nu-
ure te gusule'nu rediidxre. Badeed Dios Sprit
Dxi xtenni lo guiraa renani susoob xtiidxni.

³³ Che biejn diajg reguxhtis rediidxga, bidxech-
duxhrene, rlaizrene nugu'trene reapost.

³⁴ Dxejcti huisulii te niguii ni laa Gamaliel, nani
najt te farisee nani ruluu leii xten Israel, rebejn
rapduxh respe't dade'ga. Gunibee Gamaliel guirii
reapost neñ yu'ga.

³⁵ Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab
xhini'c rlaiztu gunnäjtu reniguiire. ³⁶ Colzaa
lajztu gajd gac xchej guyu' tej ni laa Teudas,
räjpni rnibeduxhni. Dxejc huinajl tajp gayuu
bejn. Che bagu'trenini, bire'ch guiraa rexpejn,
xhetru bejndireni. ³⁷ Neñ ijz ni guyu' cens,
biriiza Judas ni siääd Galilee. Dxejc gurejdxni
xhidajl bejn ni huinajlni. Bagu'tza bejn,
dxejcti bire'chza guiraa reni huinajlni. ³⁸ Naj rniä,
colguibicaj, colgusaan reniguiire, rexpejn Jesús.
Palga guejbcareni cayujnrene dzuunre, xtebcani
sinitlojni. ³⁹ Palga xtzuun Dios ni cayujnrene,
digacdi guscuääznu dzuunga, sa'csi guidi_lnu
guidxe'ch Gueb Dios loonu.

⁴⁰ Bichaglaiz rebixhojz xtiidx Gamaliel. Gure-
jdxrene reapost, dxejcti gudijnrene reapost, gu-
nibeereni loj reapost na'cru guiniireni xtidx Jesús.
Dxejc baslaarenini. ⁴¹ Biriitireni nez loj rebixhojz.
Cabaduxh laizrene sa'csi gujc gudejdrene trabajw
xcuent Jesucrist. ⁴² Guixe-guixee laltis baluiireni
xtidx Jesucrist neñ guidoro näjza rolijz bejn. Ca-
gusule'reni diidx lo rexpen Israel:

—Jesús najc Crist nani cabääztu jiääd.

6

Gulereni reniguii ni gudeed yätxtiil lo rexpejn Jesucrist

¹ Nen redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios neñ lastooreni, nani yu' xcâriejnreni. Reniguiire quis xhi gaureni. ⁴ Te si'c sajc chanuutis guiniabnu lo Dios, guiluiizanu xtidx Dios lo rebejn.

⁵ Guiralii rebejnnga bidxaglajzreni diidxga. Dxejcti gulereni Esteban, te niguii ni rilajzpac xtidx Dios, rbäjzza Sprit Dxan xten Dios neñ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga,

batzuubreni naareni yejc reniguiiga si'c te seen abiu'reni lo xtzuunreni.

⁷ Birechduxh xtidx Dios. Xhidajl beṅ Jerusalén huililajz xtidx Dios, nājza xhidajl bixhojz.

Gunaazreni Esteban sanārenini lo rebixhojz nani rnibee

⁸ Gucnāduxh Dios Esteban, bejn̄ni redzunro, remilagwr nez lo rebejn̄. ⁹ Dxejc rebeṅ guidoo ni laa Libertados gusloj cadilnāj Esteban. Lojreni nadxaag beṅ Cirene, nājza beṅ Alejandría, nājza gaii beṅ Cilicia, nājza sgaii bejn̄ ni siāād reguedx Asia. ¹⁰ Reniguiire di niajcdi nuzejceni diidx lo Esteban, sa'csi nasiṅduxhni, luxh cayacnāj Sprit Dxan xten Diosni. ¹¹ Dxejcti baquilreni sgaii niguii ni di gac xpejn̄ Jesús, te rājpreni:

—Biejn̄ diaagnu caniyaj Esteban toMoisés nājza Dios.

¹² Scree gujc bache'chreni rebejn̄ nājza rebejn̄ ni ruluii leii nājza rebeṅgool. Dxejcti bachagsa'reni, gunaazreni Esteban. Huinārenini lo reguxhtis xten Israel. ¹³ Dxejcti biādnāreni reniguii nani baquilreni te guniireni didx-xhii. Rājpn̄ reniguiire:

—Entis rniyaj Esteban leii xten toMoisés nājza guidodxanre. ¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn̄ ni sobga' ro'c bahuiireni lo Esteban, bahuiireni rujn̄ lojni si'c rujn̄ loj te angl xten Dios.

7

Diidx ni basule' Esteban lo rebixhojz

¹ Dxejcti rājpn̄ te bixhojz nani rnibee lo Esteban:

—¿La guli si'c guniilu, ä?

² Räj̄p Esteban lojreni:

—Colgucadiajg rextidä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen̄ guedx Harán. ³ Räj̄p Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu”
⁴ —räj̄p Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj. ⁵ Di Dios nuzalajz nicla tla' yuj cadre suu te ni' toAbram. Niluxh räj̄p Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räj̄p Dios lo toAbram: “Rexi'nlu, rexagdoolu, siläjzreni si'c benzijt. Ladxbejn̄ gacreni mos, ro'c susacsí bejn̄reni si'cti tajp gayuu ijz.” ⁷ Räj̄p Dios: “Narä sunä castiigw rebejn̄ ni gusacsíreni che najcreni mos. Narä cuää rexagdoolu ro'c, te ree guzuxhijbreni loä nen̄ guejdxre”, si'c räj̄p Dios ⁸ —räj̄pza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn̄ dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen̄ Israel.

⁹ Räj̄p Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te ben̄

Egipto. Dxejc Dios goptzu'tz José. ¹⁰ Che gudejd José trabajwduxh, gucnäj Diosni. Badeed Dios yäl_nasinduxh lojni. Bejn Dios bichag_lajz rei Faraón José. Badeed rei Faraón guj_cni gubernadoor xten Egipto. Gunibeeza José guira'ti xhixten reiiga.

¹¹ Räj_pza Esteban:

—Che bidzuj_n dxej guj_c te gubij_n, guiraa ne_n reguedx Egipto näjza guiraa ne_n reguedx Canaán, trabajwduxh cadejd guiraa rebej_n. Xhet guyu'di xhi niajw retoxtadgoldoonu. ¹² Che biejn diajg x_tadgoldoonu Jacob yu' xhi gaureni ne_n reguedx xten Egipto, ro'c baxha_lni rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxha_l José diidx jiäd x_tadni Jacob, näjza guiraa resa'ni, cuääzreni Egipto. Najc rebej_nga si'cti gayonbitzubigaii bej_n. ¹⁵ Si'c guj_c te huij Jacob guedx Egipto. Ro'c guläjz_ni, ro'c gujt_ni. Ro'c gujtza retoxtadgoldoonu. ¹⁶ Dxejcti huiinäreni rextzujtreni loj Siquem te biga'tzsacreni ne_n baa nani gusii toxtadgolnu Abram lo rexi'n Hamor ne_n guedx Siquem.

¹⁷ Räj_p Esteban:

—Che bidzuj_ngajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu ne_n guedx Egipto. ¹⁸ Dxejcti guyu' te xreii Egipto ni di gan guiraa redzunsac nani bejn toxtadgoldoonu José. ¹⁹ Reiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiga basälreni guiraa rebäz niguii te di laareni, te guetreni.

²⁰ Neñ redxejga, gojl Moisés. Che gujc Moisés báz, te báz daani, saru rujn lojni, huinälajz Diosni. Gułaani choñ bäii rolijzni. ²¹ Dxejc huisälrenini, te guzobj xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni. ²² Bisieed Moisés guiraa ni najn rebeñ Egipto. Gunisa'cni diidx, bensa'cni dzuun.

²³ Räj p Esteban:

—Che guyu'ni tiuu ijz, banaj lajzni resa'ni ni najc xpejñ Israel, huijni cadro rbäjzreni. ²⁴ Dxejc bahuiini casacsí te beñ Egipto te beñ sa'ni. Sas bagu'tni beñ Egipto. ²⁵ Bejn Moisés xhigab pet sacbee resa'ni cayacnä j Diosni te guslaani rexpejñni. Luxh di resa'ni niacbee si'c. ²⁶ Che bara yääl, bahuii Moisés cadilñäj sa'reni tiop xpeñ Israel. Räj p Moisés lojreni: “Colcuedxi, Dad. Lagajc sa'tu cadilñäjtu. ¿Xhicuent rdijltu?” si'c gunii Moisés, te na'cru tilñäj sa'reni. ²⁷ Dxejcti nani cayunniälajzga, balanaani Moisés, räj pni loj Moisés: “¿Chu baniidx yälrnibee lojlu te jiädnibeelu nuure?” ²⁸ ¿La rlajzlu ju'tlu narä si'c bagu'tlu beñ Egipto naii?” —räj pni—. ²⁹ Che biejn diajg Moisés rediidxga, baxunni, huijni zijt. Huiläzsijcni guedx Madián. Ro'c bachñaani, guyu' tiop xiñgaanni.

³⁰ Räj pza Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rlajzni nuhuisa'cni yajgga. Dxejc biejn diajgni gunii Dios, räj pni lo Moisés: ³² “Narä nacä

Xtios rextadgoldoolu, narä nacä Dios xten Abram, näjza xten Isaac näjza xten Jacoob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'a ree. ³⁴ Abahuiä xho cagusacsí reben Egipto rexpənä. Abiejn diagä xho roonreni. Naj abiälä te guslää rexpənä. Gudaa naj, suxhalälu chäälü Egipto.”

³⁵ Räjp Esteban:

—Dios badeed yälrnibee lo Moisés nani baze' retoxtadgoldoonu che räjpreni: “¿Chu baniidx yälrnibee lojlu te jiädni beelu nuure?” Baxhal Dios Moisés te guinibeeni xpejn Dios, gucnäjza Dios Moisés baslääni rexpejni nen nación Egipto si'c gunii angl xten Dios che baluilojni lo Moisés nen yaguejchga. ³⁶ Gulää Moisés rebejnnga. Ganid-doo bejn Moisés redzunro, yälrdxeloj nen nación Egipto näjza ro' nisdoo ni laa nisdoo xniaa. Tiuu ijz cuansaj retoxtadgoldoonu nen yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räjpni loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés guyunäj rebejn nen yubidzro. Xangl Dios guninäj Moisés nen dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹ Räjp Esteban:

—Niluxh di retoxtadgoldoonu nusoob rextidx Moisés. Di rlajzreni guinibee Moisésreni. Canaduxhlajzreni nación Egipto. ⁴⁰ Che sää Moisés dajn Sinaí, räjpreni loj Aarón bejtz Moisés:

“Benchee banäjb gac xtiooznu, te nidreni loonu, te chanajlnureni. Chu gan con Moisésre ni baluii nezyuj che gulääni nuure guejdx reEgipto.” ⁴¹ Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴² Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcní si'cni caj lo guijtz ni bejn reniguii nani bacuaa rextidx Dios. Räjþ Dios: La'tu bejn Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räjþ Dios.

Cuansanäjtu te yu' najcw guiid cadro chu te banäjb.

Nenga guyu' banäjb ni laa Moloc, nani najtu najc xtioostu.

Gojnzatu balbäze' xten xtioostu ni laa Remfán.

Redios ni bencheetistu reni'c gojnntu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjþni lojreni:

—Nejn reyubijdz gojþ retoxtadgoldoonu te yu' najcwni guiid. Gujcní xquidooreni. Ro'c guninäjreni Dios. Benchee retoxtadgoldoonu yu' najcw guiidga si'cni gunibee Dios che baluiini lo Moisés xhoni gacni. ⁴⁵ Che gujt Moisés, Josué gunibee lacuaa toMoisés, huinäni retoxtadgoldoonu nación Canaán. Batzujlnreni yuro ni najcw guiid te näj ni'c huinäreni Canaán. Gulää Dios rebejn

ni guläjz neñ reguedx Canaán. Dxejcti bia'n re-toxtadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp ñei David. ⁴⁶ Huinälajz Dios David. Räjñ David lo Dios: “Rlazä gunä te guidoo par guejblu, Dios xten nuure, rexpejn Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjñ Dios:

⁴⁹ Si'c najc te yagxhilsa'c cadro rnibee ñei, si'c najc xhaguibaa cadro rbeä.

Si'c te bancw cadro rsiuj ni' ñei, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjñ Dios.

⁵⁰ ¿La et ñaädi benchee guiraa nani ruhuiitu?, räjñ Dios.

⁵¹ Räjñ Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäüza diajgtu. Di'tu chanälajz xtuun Sprit Dxan xten Dios, dizani cuääz neñ lastootu. Si'c bejn re-toxtadgoldootu, si'cza rujntu.

⁵² Basacsí re-toxtadgoldootu guiralii reniguii nani gunii xtidx Dios. Nicla tejni direni niu. Bagu't re-toxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gujtni. ⁵³ La'tu biannäjtu leii nani gunii reanjl xten Dios loj Moisés, luxh la'tu ditu nucua-diajg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. ⁵⁵ Rbäjz Sprit Dxi'an xten Dios neñ lastoo Esteban, ni'cni bahuiztu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjpe Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixatreni yejc Esteban. ⁵⁸ Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcn, guläyalreni xhajbreni; te niguii ni laa Saulo biannäj xhajbreni. ⁵⁹ Lal ni cagucuaareni guij yejcn, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquiylureni.

Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx

Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhrenei sa'csi riareni gujt Esteban.

³ Biäädza Saulo, guixe-guixee basacsini rebejn nani huililajz xtidx Dios. Biu'ni rolizrenei, gu-naazni reniguii näjza regunaa te basäunireni nen latzguiib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjpnı:

—Jesús najc Crist nani cabäjztu jjääd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' benđxab nen lastooreni. Che gunibee Felipe guirii rebenđxab lastoo rebejnğa, guredxa' rebenđxabga, dxejcti biriireni nen lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrnibee Jesucrist basiajz Felipe guiraa rebejnğa. ⁸ Sa'csi gujc si'c, bibalazduxh guiraa rebejn nen guejdxga.

⁹ Guyu' te niguii ni laa Simón nen guejdxga. Bisieedni bejnıi xhidajl redzuun yälbidxaa, basgueeni rebenğuejdxga. Bidxeloduxh rebenğuejdx lojni. Räjpnı lo rebejn rutru chu stee bejn ni najc maazru benro lojni. ¹⁰ Luxh guiraa rebejn, rebiuux, rebenğool, rebenrajp, rebenproob bacuadiajgreni xtidx bidxaaga, räjpreni:

—Laani rajpni yälrnibee xten Dios.

¹¹ Xchero basgueeni rebejn, bidxelojreni rextzunyälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnsireni, niguii näjza gunaa. ¹³ Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxaan xtenni lojreni, ¹⁶ sa'csi gajd Sprit Dxaan xten Dios jädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist. ¹⁷ Dxejc batzuub Pedr näjza Juan ñaareni yejc tejga renani ahuililajz xtidx Dios, dxejc badeed Dios Sprit Dxaan xtenni biädläjzni neñ lastooreni.

¹⁸ Che bahuii Simón biädläjz Sprit Dxaan xten Dios lastoo rebejn ni batzuub reapost ñaani yejcreni, rlajz Simón nudeedni meel loj reapost, ¹⁹ räjpni lojreni:

—Colguniidx yälrnibee loä te si'cza gudzubä ñää yejc rebejn, te jiu' Sprit Dxaan xten Dios neñ lastooreni.

²⁰ Dxejcti räjp Pedr lojni:

—¡Sunitloj xmeellu con luj! Xho gunlu xhigab siilu Sprit Dxaan xten Dios nani rudedxlia' Dios.

²¹ Digacdi gunlu dzuun ni riennu, sa'csi xhet

laadi najc lastoolu nez loj Dios; yu' dojl neñ lastoolu. ²² Basie'ch lajzlu, badzucaj rexhigab guiidx xtenlu. Guredx-gunab lo Dios, top susiäj̄l lajz Dios xtojllu ni bejnlu neñ lastoolu. ²³ Naj narä nanä ruguilazduxhlu, luxh runduxhlu xhigabguiidx.

²⁴ Dxejcti räjp Simón lo guiro'preni:

—Colnab loj Dios xcuentä te na'c sacä si'cni canitu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siäd nación Etiopía

²⁶ Dxejcti biäd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sä'ti Felipe. Che bidzujñni lo nezyujga, bidxaagni te dade' ni siäd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biäd dade'ga guedx Jerusalén te sagajñni Dios. ²⁸ Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero.

²⁹ Dxejcti räjp angl xten Dios lo Felipe:

—Gubig cuä' gare'tga, guninäy dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guiitz nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijt̄z ni caj xtid̄x
Dios rnīi scree:

Di xiil cuedxa' che rinä bejn̄ni cadro guet̄ni;

dxitis raa xiil che ruhuajrenini.

Si'c te xiil najc niguiire,

xhet rnīidini mase rusacsíduxhrenini.

³³ Basacsíduxhrenini.

Reguxhtis ni niuj̄n yälguxhtisni xhet laliidi bejn̄-
reni.

Xhet si'cti nunyäj̄l gunreni.

¿Xho guiniinu yu' xpejn̄ni?

Ni abagu'trenini. Diruni guibaj̄n lo guedxliuj̄.

³⁴ Dxejcti gunabdiid̄x beñ Etiopía, räjp̄ni lo Fe-
lipe:

—Gunilaa loä, chuni'c ruzä't niguii nani bacuaa
reguijtzre, ¿la ruzä'tni lagajc laani o la ruzä'tni
ste'ca bejn̄, ä?

³⁵ Gusloj basule' Felipe rediid̄x nani abil̄
dade'ga. Dxejcti basule'ni rediid̄x xcuent

Jesucrist. ³⁶ Lał̄ ni sääreni lo nezyuj̄, bidzuj̄reni te
lajt cadro yu' nis. Dxejc räjp̄ dade'ga lo Felipe:

—¡Bahuii, ree yu' nis! ¿Xhi rudxoj̄n tiobnisä?

³⁷ Dxejc räjp̄ Felipe lojni:

—Palga rililajzlu xtid̄x Dios neñ lastoolu, sajc
tiobnislu.

Dxejc räjp̄ dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäj̄t
guiro'preni, biu'reni neñ nis, ro'c batiobnis Felipe

dade'ga. ³⁹ Che biriireni neñ nis, huinä Sprit Dxañ
xten Dios Felipe ste'ca lajt. Dxejc diru dade'ga

nuhuii lo Felipe. Sä'ti dade'ga lajdxni, cabalaz-
duxhni. ⁴⁰ Dxejcti chela guchee Felipe abidzuj̄ni

guedx Azoto. Baluiizani xtidx Dios nen guiraa reguejdx che bidzujn lini guedx Cesarea.

9

Huililajz Saulo rextidx Jesucrist (Hch. 22:6-16; 26:12-18)

¹ La^ltis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guijtz chanäni lo reguidoo nen guedx Damasco te palga guidxälni reni najc xpejn Jesucrist nen reguidooga, niguii sigac gunaa, guliibnireni, jiädänireni guedx Jerusalén te jiäureni. ³ La^l sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo. ⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpēna?

⁵ Rāj^p Saulo lojni:

—¿Chuluj Dad?

Rāj^pni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní yejc caru'ch.

⁶ Bidxebduxh Saulo, racejsni rāj^pni:

—Dad, ¿xhini'c rlajzlu gunä?

Dxejc rāj^p Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn ni siädnä Saulo sugadxireni, bidxebreni sa'csi biejn diajgreni te xse' bejn, luxh rut

lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco. ⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäälü lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, ben Tarso. Cabejdx, canabni löä naj. ¹² Lo bacal abahuiini siääd te niguii ni laa Ananías te gutzuubni naani yejcnı te fiini stehuält.

¹³ Dxejctı räjp Ananías lojni:

—Dad, abiejn diagä xho basacsı niguiiga rexpejnlu nen guedx Jerusalén. ¹⁴ Luxh rebixhojz ni rnıbee abadeed guijtız lojni te guiniaazni ree guiraa rebejn nani rbedx-rniab lojlu, chanänireni jäüreni.

¹⁵ Dxejctı räjp Jesucrist lojni:

—Huij, narä aguleäni te gunni xtzunä. Suluiini xtıdxä loj rebenzıjt nani digac xpen Israel, näjza loj renı rnıbee renacion, näjza loj rexpejn Israel.

¹⁶ Narä suluiä lo Saulo trabajwduxh ni tedni te jäädınajlnı narä.

¹⁷ Dxejctı sää Ananías, bidzujnıni ro yu' cadre rbäzlaa Saulo. Batzuubni naani yejc Saulo. Dxejctı räjp Ananías loj Saulo:

—Betzä Saulo, Jesucrist ni rnıbee, nani baluiloj lojlu lo nezyuj cheni siäädılu, lagajc laani baxhalni

narä te filu stehuält, te jädläjzza Sprit Dxiän xten Dios neñ lastoolu.

¹⁸ Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwñi, guc nadaanni stehuält. Xchej guyunäj Saulo rexpejn Jesucrist neñ guedx Damasco.

Gusloj basule' Saulo xtidx Dios neñ guedx Damasco

²⁰ Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelorejñi, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguiib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzut' Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxuñ Saulo guedx Damasco

²³ Che gudejd xhidajł dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'trenini.

²⁵ Dxejcti che gojł te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxuñni guejdxga.

Bidzujñ Saulo guedx Jerusalén

²⁶ Che bidzujn Saulo guedx Jerusalén, rljazni nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räjþ Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani rnii didx griegw. Laareni rdxechduxhrene, rljazreni nugu'treni Saulo sa'csi direni nichagljaz xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxañ xten Diosreni.

Biajc Eneas

³² Che gusloj sahuü Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälñi te niguii ni laa Eneas. Agujc xhujñ ijz naga' niguiiga cayacxhuuni. Abixu'ñ tiejxhni, digacdiru guiliini.

³⁴ Dxejcti räjþ Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcnì, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni neñ reguejdxga huililajz xtidx Dios.

Gubansac Dorcas

³⁶ Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn.

³⁷ Gucxhuu gunaaga, dxejc gujtni. Che gulujx bahuajz rebejn togoolga, huitixhrenini neñ te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjpp redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huinäreni Pedr neñ yu' cadro naga' togunaaga. Ro'c cayonduhx guiraa regunabiuud, baluiireni lo Pedr guiraa rexhajnreni nani benchee Dorcas, ni badeed Dorcas lojreni che nabajnni. ⁴⁰ Dxejcti gunibee Pedr birii guirareni neñ yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, räjpnì:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. ⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga

lojreni te bahuilojreni aguban̄sacni. ⁴² Gucbegajc reben̄ guedx Jope xhini'c gujc, dxejcti xhidajl rebejn̄ga huililajz xtidx Jesucrist. ⁴³ Xchejza guyu' Pedr ro'c, gulājzni rolijz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc ben̄zajt, dini gac ben̄ Israel. ² Ben̄sacduxh najc Cornel, nājza guiraa resa'ni, sacruduxh rusoobreni xtidx Dios. Rudeedni gojn lo reben̄ prob xten Israel. Guixe-guixee rbejdx, rniabni lo Dios. ³ Te dxej, si'cti rcachon̄ gudxej, si'c lo bacal̄ bahuiini loj xangl Dios, rājpn̄i loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidx-elojni, rājpn̄i lojni:

—¿Xhini'c, Dad?

Dxejcti rājpn̄ angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben̄ prob, ruhuii Dios ni rujnlu, ni'cni rnalajz Dios luj. ⁵ Naj baxhal̄ tiop niguii chāā guedx Jope te chaxiireni Simón Pedr. ⁶ Rbājzni rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni nājza te xsoldaadni nani sanālajz Dios. ⁸ Dxejc bij Cornel diidx lojreni xcuent ni gusajcni, dxejc baxhal̄ni redade'ga guedx Jope.

9 Che bara yääl, sääreni lo nezyuj. Asiäddzungen gajxhzeni guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. ¹⁰ Calanduxh Pedr, rlajzni gauni. Laļ ni cayujnreni xhi gauxhuejni, gusloj canixcalni. ¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. ¹² Neņ bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choņ huält gujc si'c, huä'psac bariaadga xhaguibaa. ¹⁷ Laļ ni cayujn Pedr xhigab xhichani'c säloj nani bahuiini, bidzujn reniguii ni baxhal Cornel ro' yu'ga, sa'csi agunabdiidxreni caro rbäjz Simón nani ruscoodz guiid.

¹⁸ Che bidzujnreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laļ ni cayujn Pedr xhigab xcuent ni bahuiini, gunii Sprit Dxaan xten Dios lojni, räjpni:

—Bahuii, choņ dade' caguiillu. ²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

²¹ Dxejcti biäjt Pedr jiaaga, bidzujnni cadro suga' redade'ga, räjpni lojreni:

—Narä nacä ni caguiltu. ¿Xhi siäädtu?

²² Räjp reniguiiga lo Pedr:

—Cornel, nani rnibee te gayuu soldaad, te bensa'c, te bejn ni rajn Dios, te bejn ni sanälajz rexpejn Israel, laani baxhal nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejnga, biu'reni nenyu'. Ro'c bia'nreni te guxhijn. Che bara yääl, Pedr näjza sgaii ben Jope ni najc xpejn Jesucrist, sanä redade' ni baxhall Cornel.

²⁴ Che bara yääl, bidzujnreni guedx Cesarea. Abatojp Cornel resa'ni näjza reexamigwni rolijzni. Cabäjzreni guidzujn Pedr. ²⁵ Che bidzujn Pedr ro yu', huichagloj Cornelni, bazuxhijbni lo Pedr.

²⁶ Dxejc gunaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni nenyu'. Che biu'ni bahuii Pedr nadxagsa' rebejnnen yu'. ²⁸ Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajc guchagsa'ä chutis bejn. ²⁹ Ni'cni, che gurejdxtu narä biälgacä. Naj rniabdixä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'. ³¹ Najni loä: “Cornel, che rbedx-rniablu lo Dios, riejn diajg Dios xtiidxlu,

che rudeedlu meel lo reben̄ proob, racbee Dios, di lajzni jiäl̄ luj. ³² Ni'cni naj̄ baxhal̄ tiop dade' chäǟ guedx̄ Jope te chaxiireni Simón̄ Pedr nani rbäzlaa rolijz̄ Simón̄ ni ruscoodz̄ guijd. Rolijzni sojb̄ gajxh ro' nisdoo. Che guidzuj̄ni, laani gusule'ni xtid̄x̄ Dios lojtu.” ³³ Dxejc̄ baxhalǟ chu biädxiilu. Xquix-tiostelu biäd̄dlu. Naj̄ anadxagsa'nu ree nez loj Dios te jiejn̄ diajgnu rextid̄x̄ Dios ni baniid̄x̄ni lojlu guiniilu loonu.

Basule' Pedr xtid̄x̄ Dios rolijz̄ Cornel

³⁴ Dxejcti räjp̄ Pedr lojreni:

—Naj̄ gucbeliǟ tebloj rinälajz̄ Dios guiraa bejn̄; reben̄zijt̄ sigajc̄ rexpejn̄ Israel. ³⁵ Niluxh rinälajz̄ Dios chutis ben̄ guedx̄liuj̄ nani ruzuxhijb̄ lojni, nani rusoob rextiid̄x̄ni, nani laaca nabajn̄. ³⁶ Badeed Dios xtiid̄x̄ni loj rexpejn̄ Israel, basule' Dios biäd̄ǟ Jesucrist te gac chanälaaznu Dios te cuedx̄ilajznu, sa'csi Jesucrist rnibee guideb̄ guedx̄liuj̄. ³⁷ Che gulujx̄ baluii Juan ni rutiobnis xcuent̄ yäl̄robnis, dxejc̄ gusloj basule' Jesucrist xtid̄x̄ Dios nez regued̄x̄ Galilee. La'tu najntu xho bire'ch xtid̄x̄ Jesucrist guideb̄ nez neñ̄ regued̄x̄ Judea. ³⁸ Nancheetu xho badeed Dios yäl̄rnibee loj Jesucrist, ben̄ Nazare't. Badeedza Dios Sprit Dxan xtenni te cuääz̄ni nen lastooni. Nancheetu xho bejn̄ni redzunro, remilagwr, basiajcni rebejn̄ nani caguteed̄ ben̄dx̄ab̄ trabajwduxh. Redzunroga bejn̄ni sa'csi bennäj̄ Diosni dzuun. ³⁹ Bahuiloonu guiraa redzuun ni bejn̄ Jesucrist neñ̄ regued̄x̄ Israel näjza guedx̄ Jerusalén. Bacuaa rexpejn̄ Israel Jesucrist lo cruzjz̄, ro'c̄ gujtni. ⁴⁰ Dxejcti che biojn̄ dxej, guläs̄ Dios Jesucrist lo reben̄gut,

gubaṅsacni, badeed Dios yälṛnibee lojni te gujc biädluiloj Jesucrist loonu. ⁴¹ Di Jesucrist nululoj loj chutis bejṅ. Lojtis renani agule Dios gutie'ch diidx gubaṅsac Jesucrist lo rebeṅgut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubaṅsacni lo rebeṅgut. ⁴² Baxhaḷni nuure chatie'chnu diidx loj guiraa rebejṅ, chosule'pacnu Dios gule Jesucrist te gacni juejz xte rebeṅbajṅ näjza xte rebeṅgut. ⁴³ Galooli bacuaa renani gunii xtidx Dios lo guijtz, räjpreni: “Guiraa rebejṅ ni chalilajz xtidx Jesucrist sudzucaj Dios xtojḷreni.”

Biädlajz Sprit Dxan xten Dios neṅ lastoo rebeṅzijt

⁴⁴ Laḷ ni canii Pedr rediidxga, biädlajz Sprit Dxan xten Dios neṅ lastoo renani huililajz xti-idxni. ⁴⁵ Bidxeloj guiraa rexpejṅ Israel nani huinä Pedr sa'csi biädlajz Sprit Dxan xten Dios neṅ lastoo renani najc beṅzijt. ⁴⁶ Gucbeereni biu' Sprit Dxan xten Dios lastoo rebeṅzijt sa'csi bejṅ Sprit Dxan guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejṅre, ni sigajc biädlajz Sprit Dxan xten Dios neṅ lastoonu, abiädlajzni neṅ lastoo rebejṅre.

⁴⁸ Dxejcti gunibee Pedr gurobnisreni te gacbee bejṅ najcreni xpejṅ Jesucrist. Dxejcti gunabreni loj Pedr jia'nni ro'c tiop-choṅ dxej.

11

Basule' Pedr xho biädlajz Sprit Dxan xten Dios lastoo rebeṅzijt lo rexpejṅ Jesucrist neṅ guedx

Jerusalén

¹ Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzajt ni digac xpejn Israel xtidx Dios. ² Che bidzujñ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudiñnäjreni Pedr. ³ Räjpreni lo Pedr:

—¿Xhicuent biu'lu rolijz benzajt nani xhet yu'di bee si'c nuure? ¿Xhicuent gudaunäj lureni, ä?

⁴ Dxejcti basule' Pedr diidx xho gujc huijni loj rebenzajt:

⁵—Yu'ä guedx Jope. Cabedx-canabä lo Dios, dx-
ejc si'c gunixcalä, bahuiä bixal xhaguibaa, siädjiäjt
te bariadro, naliib guidap xi'ni. Siädjiätchäiini nez
loä. ⁶ Che bahuisa'cä, neñga yu' guiraloj reman ni
yu' lo guedxliuj nani rsianäj guidap ni'ni, renani
rbäjz neñ dajn, renani rxeeb si'c bäl, näjza renani
rutajt. ⁷ Dxejcti biejn diagä naj Dios loä: “Pedr,
huisu. Bagu't man gaulu.” ⁸ Dxejcti räpä: “Di-
gac dini Dad. Nicla tej gadna gauä te man nani
rnii leii xtenlu najc mandxuudx.” ⁹ Dxejc gunisac
Dios loä: “Na'cru guiniilu nacdXuudx recos nani
abasia Dios.” ¹⁰ Che gujc choñ huält gunii Dios
si'c, huä'psac bariaadga xhaguibaa. ¹¹ Lagajc orga
bidzujñ choñ dade' ro yu' cadro yu'ä. Guedx
Cesarea biriireni, biädxiireni narä. ¹² Dxejc gunii
Sprit Dxañ xten Dios loä: “Huinä reniguiire. Na'c
gun tiop lajzlu.” Dxejcti huinäã xho'p beñ Jope,
dade' nani rililajz xtidx Jesucrist. Che bidzunu
guedx Cesarea, biu'nu rolijz Cornel. ¹³ Basule' Cor-
nel diidx loonu xho baluiloj te angl xten Dios lojni
lagajc rolijzni. Räjñ angl xten Dios lojni: “Baxhal

tiop dade' chää guedx Jope te chaxiireni Simón ni rniireni Pedr. ¹⁴ Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵ Che gusloj cagusule'ä xtidx Dios lojreni, biu' Sprit Dxaan xten Dios nen lastooreni si'c biu'ni lastoonu galooli. ¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxaan xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxaan xtenni lojreni si'c baniidxni Sprit Dxaan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxaan xtenlu lojreni.”

¹⁸ Che biejn diajg reben Jerusalén rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechlajzreni te guibannäjreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. ²⁰ Lojreni nadxaag gaii ben Chipre, näjza gaii ben Cirene. Redee bidzujñ guedx Antioquía. Ro'c gusloj caniireni lo benzajt nani rnii didx griegw. Basule'reni lo rebenzajtga guiraa xcuent Jesucrist. ²¹ Gucnäjä Diosreni caniiireni xtiidxni. Xhidajl rebejnğa huililajz xtidx Jesucrist, basoobreni xtiidxni.

²² Che biejn diajg rexepejn Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³ Che bidzujn Bernabé guedx Antioquía, bibalazduxhni che bahuiini xho cayunnäj Dios rebejnga. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Bensa'c najc Bernabé. Rililazduxhni xtidx Jesucrist. Racnäjdugh Sprit Dhan xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxalni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidaldugh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Neñ redxejga birii gaii dade' nani rni xtidx Dios. Guedx Jerusalén biriireni, bidzujnreni guedx Antioquía. ²⁸ Huisulii te dade'ga ni laa Agabo. Gucnäj Sprit Dhan xten Diosni te guniini siääd te gubijn guideb guedxliuj. Luxh gujc gubijnga nen reijz ni gunibee rei Claudio ni sajru. ²⁹ Dxejcti rexepejn Jesucrist ni rbäjz guedx Antioquía bejn xhigab cade tejreni gudeed meel chää lo rexepejn Jesucrist ni rbäjz nen reguedx Judea. ³⁰ Batojpreni meel, baxhalrenini lo rebengool ni rnibee rexepejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacob, biäu Pedr neñ latzguiib

¹ Neñ redxejga, trabajwdugh bateed rei Herodes gaii rexepejn Jesucrist. ² Gunibeeni

gujt Jacoob betz Juan, biru' guejn̄ni. ³ Che bahuii Herodes bibalazduxh rexpejn̄ Israel sa'csi bagu'tni Jacoob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij. ⁴ Che gunaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn̄ Israel che ted lanij. ⁵ Yu'ti Pedr neñ latzguiib, dxejcti durtis cabejdx, canab rexpejn̄ Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujnti dxe bispr dxej ni rlazj Herodes nibää Pedr nez loj rexpejn̄ Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniib-nini te gubajñni. Räjpn̄i lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räjpn̄ xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpn̄ xangl Dios lo Pedr:

—Gojt xhablazlu, gudanajl narä —räjpn̄i.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejn̄ni xhigab pet canixcalni. ¹⁰ Gudejdreni nez loj te soldaad, gudedgajcreni nezloj steeni, dx-ejc bidzujñreni ro' puertguiib xten latzguiib nani caj lo nezuyuj ni rdejđ galäii guejdxga. Xtebca bixal

puertroga, biriireni gusajreni tebbezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejcti si'cni gubajñ Pedr, bejnñi xhigab:

—Naj sii nanä baxhal Dios te xanglñi baslaa narä ladznaa Herodes te digacdi gun rexpejñ Israel nani rlajzreni gunñajreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadx-agsa' xhidajl rexpejñ Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dx-eyc gubig te dxa'p ni laa Rode, bacuadiajgni ro lä'. ¹⁴ Che biembee Rode xse' Pedr, sa'csi bibal-azduxhni, biallajzñi nuxhalni ro lä'. Alga baxuñni biusacni neñ yu', räjpni lojreni:

—Pedr suga' ro lä'.

¹⁵ Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr.

¹⁷ Dxejcti bazääb Pedr ñaani te na'cru jiejyreni. Dxejcti bij Pedr diidx xho baxhal Dios ro' latzguiib. Dxejcti räjpni:

—Colchaye'tz lo Jacob näjza lo rexpejñ Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib.

¹⁹ Gunibee Herodes huitiilreni Pedr, gunabdi-idxzani lo resoldaad xho gujc birii Pedr, dxejcti

gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben̄ Tiro nājza reben̄ Sidón Herodes, ni'cni diruni gusaan guto' rebejn̄ nez cadro rnibeeni xhi gau reben̄ Tiro nājza reben̄ Sidón. Ni'c biääd xhidajlreni te guiniabreni jiaj̄l lajzni, te na'cru guidxe'ch Herodes lojreni. Abenx-gaaren̄i xamiigwreni Blasto, mos ni yu' lo reīi Herodes, mos ni saj̄cru lo guiraa rexm̄os Herodes. Guninäj Blasto Herodes xcuentreni te na'cru guidxehnäj Herodes rebejn̄ga. ²¹ Basoobtini te dxej te guininäjn̄ireni. Dxejga gojt Herodes xhajib̄ reīini, gurejni lo xyacxhīl̄ reīini. Dxejcti gusloj caniini didxsa'c loj rebejn̄ga. ²² Guredxa' rebejn̄ räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn̄ na-jcni te dios, sa'csi dini niliä'p xpala'n Dios.

²⁴ Xhidajl bejn̄ biejn̄ diajgni xtidx Dios, huililajzreni xtidx Dios.

²⁵ Che gulujx badeed Bernabé nājza Saulo meel ni batojp reben̄ Antioquía lo reben̄gool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxan xten Dios Bernabé nājza Saulo

¹ Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujcni si'c bejtzni; näjza Saulo. ² Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxan xten Dios lojreni:

—Colcucue Bernabé näjza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni ñaaren i yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

Guiro'preni baluii xtidx Dios lo reben Chipre

⁴ Baxhal Sprit Dxan xten Dios Saulo näjza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre. ⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Näj Marcw gucnäjreni. ⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagugueeni rebejn guejdxga, räjpni xtidx Dios canini, niluxh dini gac xtidx Dios. ⁷ Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlazjni jiejn diajgni xtidx Dios. ⁸ Dxejcti Barjesús, ni laaza Elimas, bidxagdijñni guiro'preni sa'csi di rlazjni chalilajz

Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batiyp Sprit Dxi xten Dios lastoo Pabl, räjpni loj Barjesús:

¹⁰ —Rusgueduxhlu rebejn, najclu benlatsiaj, beñguidxduxhlu, najclu xi'n Satanás, beñdxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? ¹¹ Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicäigajc lojni. Dxejctiru cuansajni caguiilni chu guiniaaz ñaani guluiini canejz chääni. ¹² Che bahuii Sergio Paulo xhi gusajcni, huililajzni xtidx Dios, sa'csi bidxelo-duxhni xcuent xcäl_rului Dios.

Bidzujñ Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panflia. Che bidzujñreni guejdxga, gubisac Juan, ni rni-ireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusi-lajz rexpejn Israel, biu'reni neñ xquidoo rexpejn Israel, ro'c gurejreni. ¹⁵ Che gulujx bil te dade' reguijtz xten Dios ni laa leii näjza reprofe't, baxhal reguxhtis xten guidoo chu huigajñreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejc huisulii Pabl, guläsni naani bejnii seen lo rebejn te cuadiajgreni xtiidxni. Räjþ Pabl lo-jreni:

—Colcuadiajg, la'tu rexpejn Israel, guiraatu ni rajn Dios. ¹⁷ Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjdexh Diosreni bejnii remilagwr, te guläänireni guedx Egipto. ¹⁸ Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. ¹⁹ Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. ²¹ Dxejcti gunab rexpejn Israel te reii lo Dios te guinibee reiiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee toreii David. Räjþ Dios: “Agucbeä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

²³ Räjþza Pabl:

—Galooli bia'n diidx lo rexagdoos David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnnga, rudzucajni xtojlnu, ruslaani nuure lo dojl. ²⁴ Che gusloj cagulijdx Juan rebejn, baluini nanabpac gusiechlajz rexpejn Israel, tiobnisreni te jia xtojlni. ²⁵ Niluxh guxii riäädex guluux Juan dzuun ni badeed Dios gunni che räjþni lo rebejn:

“¿Chu rujntu xhigab nacä narä? Dina gacä Crist nani bia'n diidx guxhal Dios. Colhunii, detzä siääd tej ni sacduxhru loä; nicla gac surloä te cuää xcura'chni.”

²⁶ Räjpa Pabl:

—Rniä lojtu sa'ä, rexagdo toAbram, näjza lo chutis ni rajn Dios, loonu baxhal Dios xtiidxni ni rusule' xho rudzucaj Jesucrist xtojnu, xho ruslaani nuunu lo dojl. ²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzojb xtidx Dios ni caj lo gujtzga. ²⁸ Baliidxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo gujtz xcuent Jesucrist, gulätreni Jesucrist lo cruzj, bacua'tzrenini nen baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo reexamigwni nani biädnajlñi nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. ³³ Guläs Dios Jesucrist te huille' diidxga par nuure, rexagdooreni. Agujc xchero gunii Dios te diidx ni caj nen Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

³⁴ Räjpa Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii,

räjp Dios: “Sunidxä recossa'c lojlu si'c ni bia'nä di-idx con toDavid.” ³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” ³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucriste, beñ ni caniä xcuentni, laani rudzucajni rextojlñu. ³⁹ Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo lei xten toMoisés. ⁴⁰ Col̄susiñ te na'c sajctu recos ni caj lo guijtz ni bacuaa te niguii nani bacuaa xtidx Dios: ⁴¹ Col̄huilaa, la'tu ni ruxhiznäj xtidxä col̄guidxeloj, col̄nitloj, sa'csi ñaj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴² Gulujxti xtidx Pabl, biunejz rebejñ. Che birinäj Pabl Bernabé biädñi rebejñre lojreni, räjpreni: —Jiädsactu ste xmaan te gusule'rutu rediidxre loonu.

⁴³ Che care'ch rebejnga, xhidajl rexpejñ Israel, näjza xhidajl rebenzijt nani rusoob xtidx Dios si'c rujn rexpejñ Israel, birinajlreni Pabl näjza Bernabé. Dxejc baliidxreni rebejñ ni siädñajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejñ Israel, xhidalduxh rebenguejdx bire' te gucudiajgreni guinii Pabl xtidx Dios. ⁴⁵ Che bahuii rexpejñ

Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni "didxxhini". Caniyajzareni Pabl najza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibaññajtu Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejn Israel. ⁴⁷ Sa'csi si'c agunibee Xtiosnu. Scree caj xtidx Dios lo guijtz:

Suxhalätu te guluiilu rextidxä lo rebenzijt ni digac xpejn Israel,

te chalilajz rebejnğa xtidxä,

te laareni lo xtojłreni, cadrotis yu'reni lo guedxliuj, räjp Dios.

⁴⁸ Che biejn diajg rebenzijt rediidxre, bibalazduxhrenei, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcro, najza reniguii ni sajcro neñ guedx Antioquía, te bidxechnäjreni Pabl najza Bernabé, barilaagwreni Pabl najza Bernabé te biunejzreni guedx Antioquía. ⁵¹ Dxejcti Pabl najza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. ⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

14

Guyu' Pabl nāj Bernabé guedx Iconio

¹ Che bidzujn Pabl nājza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nājza lo rebenzajt. Xhidajl rebejnğa huililajz xtidx Dios. ² Niluxh sgaii rexpejn Israel nani di chalilajz xtidx Jesucrist baliidx rebenzajt te bidxechñajreni rebejn nani huililajz xtidx Jesucrist. ³ Ni'cni bia'n Pabl nājza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcäl̄rnibee Dios te bahuii bejn cayacnāj Diosreni. ⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nājza Bernabé, ⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nājza benzajt, nājza reguxhtis, rlajzreni nidxagdijlreni reapost, rlajzzareni nucuaareni guij yejc Pabl nājza Bernabé. ⁶ Dxejc gucbeereni xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, nājza reguejdx ni re' nejzga. ⁷ Che bidzujnreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajg gusiajc Diosni. ¹⁰ Dxejcti dip gunii Pabl lojni, räjpni:

—jHuisulii!

Dxejcti huisuyälni, gusajni. ¹¹ Che bahuüi rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—¿Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni.

¹³ Dxejcti te bixhojz xten xquidoo Júpiter cua' tiop gon najl guii guejnreni. Biädnäni regonga ro' xquidoo Júpiter ni suga' ro' guejdxga. Rebejn näjza bixhojz rlanjreni nugu'treni regon te ganreni Bernabé näjza Pabl si'c rajnreni rextiosreni. ¹⁴ Che biejn diajg reapost xhi cayajc, batiäjsreni tla' xhajbreni si'c te seen direni guichagljaz xhi cayujn rebejnğa. Ruxunreni bidzujnreni lo rebejn, räjpreni lo rebejn:

¹⁵ —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, nenreni,

¹⁶ Galoo basaan Diosga gun reben guedxliuj si'ctis ni rlanjreni. ¹⁷ Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te chäii bejnreni gaan guredxi rebejn, sa'csi rlanjpac rebejn nugu'treni regon.

¹⁹ Dxejcti bidzujn gatii xpejn Israel siädreni guedx Antioquia näjza guedx Iconio. Baquiilreni reben Listra te gucuaareni guij yejc Pabl. Bacuaareni guij yejc Pabl, gudobxhajxhrenini

guläärenini ro' guejdxga, sa'csi naareni agujtni. ²⁰ Dxejc laḷ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejnḡa. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx Antioquía. ²² Baliidxreni rebejn nani huililajz xtidx Dios, gucnäjreni rebejnḡa te batiplajz rebejnḡa, räjpreni lo rexpejn Jesucrist:

—Colḡsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laḷ ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujnreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujnreni guejdxga, biu'reni neḡ barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhalreni Pabl näjza Bernabé chasule'reni xtidx Dios neḡ guiraa reguejdx. Naj abaluux Pabl näjza Bernabé dzuunga. ²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnḡa guira'ti ni bennäj Dios laareni, näjza

xho badeed Dios huililajz rebenzijt nani digac rexpeñ Israel. ²⁸ Xchej biannäjreni rexpejñ Jesucrist ro'c.

15

Bidxagsa'zareni neñ guedx Jerusalén

¹ Nen redxejga bidzujñ gaii dade' ni siäd nez Judea, caguluiireni rexpejñ Jesucrist, räjpreni lojreni:

—Palga ditu gusäl bee si'c gunibee toMoisés, di Dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlreni redade'ga. Dxejc gule rexpejñ Jesucrist Pabl näjza Bernabé näjza sgaii rexpejñ Jesucrist chääreni guedx Jerusalén te guininäjreni reapost näjza rebenğool te guidon xho gac xcuent beega.

³ Huisunejz rexpejñ Jesucrist ni najc beñ Antioquía Pabl näjza rebejñ ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexpejñ Jesucrist ahuililajz rebenzijt xtidx Dios. Bibalazduxh rexpejñ Jesucrist che biejn diajgreni rediidxga.

⁴ Che bidzujñreni guedx Jerusalén, huichagloj rexpejñ Jesucristreni. Dxejcti bij Pabl näjza Bernabé diidx lo reapost, lo rebenğool nani rnibee rexpejñ Jesucrist, näjza lo rexpejñ Jesucrist, guiraa redzunro nani cayunnäj Diosreni. ⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzajt xtidx Dios, nanab chureni bee, nanabza gusoobreni leii xten to-Moisés.

⁶ Dxejcti bachagsa' reapost näjza rebenzajt nani rnibee rexpejn Jesucrist, te don xho gunreni.

⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxan xtenni lojreni si'c te seen te gacbee bejn najczeni xpejni. Sigac baniidxni Sprit Dxan xtenni loonu galoo, si'cza badeednini lo rebenzajt. ⁹ Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni. ¹⁰ Naj ¿xhicuent rusieedu Dios, ä? Di najcdi nisianäj retoxtadnu releiiga, digacdiza chosanäjnu releiiga naj. ¿Xhicuent rlaiztu chasanäj rebenzajt releiiga? ¹¹ Xhet si'cti gacni sa'csi Dios ruslaa nuure lo xtojnu che rililajznu xtidx Jesucrist, luxh si'cza ruslaani rebenzajt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgzeni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

¹³ Che gulujx gunii guiro'preni, xhet guniidi re-bejn. Jacobtis räjp lojreni:

—Sa'ä, colcuadiajg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzajt te gurejdx Dios rexpejni ni nadxaag lo

rebenzijt. ¹⁵ Luxh si'cza caj lo guijtz. Agujc xchero-
duxh bacuaa reniguui nani gunii xtidx Dios, che
räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazux-
hijb rexpejn Israel che gubajn toDavid.

Si'c gunä,

¹⁷ te jiädgajn rebejn narä te gacä Xtiosreni,
näjza guiraa rebenzijt nani najc rexpenä jiädgajn
narä,

¹⁸ si'c räjp Dios nani galooli baluiloj guiraa redzu-
unre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu re-
benzijt ni cagusiechlajzreni, renani salilajz xtidx
Dios. ²⁰ Gucuaanu te guijtz, jie'tznu lo rebenzijt:
Na'c gaureni xhi cos ni basuj bejn loj rebanäjb,
sa'csi dinu chalilajz xcuent rebanäjb. Na'cza
guesnäjreni bejn ni di gac chäälni, na'cza gaureni
bääl nani gurerejn, na'cza gaureni rejn. ²¹ Dee gu-
cuaanu te di guche'chreni xpejn Israel sa'csi nejn
guiraa reguejdx galooli yu' rexpejn Israel nani rol
leii xten toMoisés gasob sabd —räjp Jacob.

²² Che biejn diajg reapost näjza rebenzijt nani
rnibee, näjza guiraa rexpejn Jesucrist xtidx Ja-
coob, bichaglajzreni xtiidxni. Dxejcti gulereni
tiop sa'reni chanä Pabl näjza Bernabé guedx An-
tioquía. Gulereni Judas ni rniireni Barsabás näjza
Silas. Guiro'preni najc bejn ni sajru loj rex-
pejn Jesucrist. ²³ Dxejcti bejnreni guijtz huinäreni.
Bacuaareni rediidxre:

“Nuure reapost, nájza rebengool ni rnibee, nájza rexpejn xquidoo Jesucrist ruxhalnu xtixtios lojtu, resa'nu nani rbájz guedx Antioquía nájza estad Siria nájza estad Cilicia. ²⁴ Rucuaanu guijtze sa'csi biejn diaagnu birii gaii resa'nu ree biádsieedreni la'tu con xtiidxreni, cayu'tu yársia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiädniireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé nájza Pabl, nani sanälaaznu. ²⁶ Agajc balti huält rlanjreni nugu'treni Bernabé nájza Pabl, luxh direni guidxejb gusule'reni xtidx Jesucrist. ²⁷ Naj ruxhalnu Judas nájza Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtü nani digac chäältü. Palga gusoobtu recosre, laaca cayujntü. Sacrü guibajntü. Sujiannäjtu Dios.”

³⁰ Dxejcti basadiidx rexpejn Jesucrist Judas nájza Silas huinäreni Pabl nájza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtza lojreni. ³¹ Che biejn diajg rexpenzit Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. ³² Dxejcti basule' Judas nájza Silas xtidx Dios lojreni, sa'csi rudeed Dios xtiidxni

loj guiro'preni. Xhidajl diidx guniireni te bal-
ijdxreni rexpejn Jesucrist. Lacti gulecdxi redi-
idx ni guniireni lastoo guiraa rexpejn Jesucrist.
³³ Ro'c bia'nreni xchej, dxejcru cuäjb rexpejn Je-
sucrist gubi'reni te gudeedreni xtixtios loj reni
baxhalreni.

³⁴ Dxejc Silas bejn xhigab jia'nni ro'c. ³⁵ Luxh
Pabl näjza Bernabé bia'n guedx Antioquia.
Guiro'preni baluii, basule'reni xtidx Dios loj
rebejn. Guyu'za sgaii dade' ni gucnäjreni.

*Huihuisac Pabl rexpejn Jesucrist neñ guiraa
reguejdx*

³⁶ Che gudejd xhidajl dxej, räjp Pabl lo Bernabé:
—Do'o guibi' lo guiraa reguejdx cadre basule'nu
rextidx Dios te chohuiinu don xho yu' rexpejn
Jesucrist.

³⁷ Niluxh Bernabé rlajz chanäreni Juan ni laa
Marcw. ³⁸ Naaddi Pabl chääni, sa'csi birii Marcw
lojreni che guyu'reni nez Panfilia, diruni nisianäj
Pabl näjza Bernabé. ³⁹ Dxejc gudildiidxreni. Gu-
bicajtireni lo sa'reni. Ni'c sanä Bernabé Marcw,
biu'reni neñ barcw, sääreni Chipre ni re' galäii nis-
doo. ⁴⁰ Dxejcti Pabl gule Silas te sanänini. Badeed
rexpejn Jesucrist xtixtios lojreni, räjpreni gacnä
Diosreni. ⁴¹ Lal ni sasajreni gudejdreni guiraa
reguedx Siria näjza guiraa reguedx Cilicia, ro'c
gucnäjreni guiraa rexpejn Jesucrist, basule'rureni
xtidx Jesucrist lojreni.

16

Huinä Timoteu Pabl näj Silas

¹ Bidzunsac Pabl näjza Silas reguedx Derbe näjza Lистра. Ro'c bidxaagreni te xpen Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. ² Didxsa'ctis rnii rexpen Jesucrist ni yu' Lистра näjza Iconio xcuent Timoteu. ³ Rlajz Pabl chanäni Timoteu. Dxejcti basäl Pabl bee Timoteu te gujcn si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc beñ griegw. ⁴ Che bidzujnreni cade tej reguejdx, basule'reni xtidx reapost näjza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. ⁵ Bazutiyp xtidx Dios lastoo renani huililajz xtidx Jesucrist. Guixeguixee xhidajlru bejn huililajz xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, näjza estad Galacia, di Sprit Dxaan xten Dios nusaan nusule'reni xtidx Jesucrist neñ reguedx Asia. ⁷ Bidzujntireni gajxh estad Misia. Dxejc rlajzreni nijreni estad Bitinia, niluxh di Sprit Dxaan xten Dios nusaan nijreni ro'c. ⁸ Ni'c gudejdtireni stelaad estad Misia, bidzujnreni guedx Troas. ⁹ Te yääl si'c lo te bacal bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlu nuunu.

¹⁰ Che bara yääl ni gunixcal Pabl, gudilgajcnu te barcw te chonnu estad Macedonia, sa'csi

gucbeenu Dios najc nani caguxhal nuure te gului-
ini xtiidxni lo reben Macedonia. Narä, Lucas, ni
cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹ Biu'tinu nen barcw ro' guedx Troas. Bidzunnu
Samotracia, te yuj ni re' nen nisdoo. Che bara
yää bidzunnu guedx Neápolis. Ro'c biriinu nen
barcw, ¹² bionnu guedx Filipos, guejdx nani sajcro
lo estad Macedonia. Guedx romanni. Ro'c bia'nnu
tiop chon dxej. ¹³ Che gojl sabd, dxej ni rusi-
lajz rexpejn Israel, biriinu guejdxga bionnu ro'
te gueuu, sa'csi biennu xhigab ro'c jiaäd rexpejn
Israel te guininäjreni Dios. Ro'c gurejnu, guniinu
lo renane' nani bire' ro'c. ¹⁴ Lojreni nadxaag
te nane' ni laa Lidia, te benzijt ni digac xpejn
Israel. Guedx Tiatira siäädni. Ruto'ni ladmuraad
ni sacduxh. Rajn gunaaga Dios si'c rajn rexpejn
Israelni. Bacuadiajgni xtidx Jesucrist ni cagusule'
Pabl. Gucnäj Dios nane'ga te huililajzni xtiidxni.
¹⁵ Birobnisni, näjza guiraa reni rbäjz rolijzni. Dx-
ejc guniini loonu:

—Palga ruhuiitu guliä rililazä xtidx Dios, coltaa
rolizä te ro'c cuääztu.

Lacti gunab nane'ga nuunu, ni'c huijia'nnu roli-
jzni.

¹⁶ Te dxej cheni sionnu cadro rninäj bejn Dios,
bidxaagnu te dxa'p nani yu' te bendxab nen las-
tooni. Rajp rexpaxhuaanni melduxh sa'csi rusule'
dxa'pga recos ni gajd gac. ¹⁷ Birinajl dxa'pga Pabl
näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb
guedxliuj. Ruluiireni loonu xho laanu lo xtojnu
—räjp dxape're.

¹⁸ Balti dxej birinajl dxape'ga nuure, entis canini rediidxga lo rebejn. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcäl̄rnibee Jesucrist rniä lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

¹⁹ Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhreni guiro'preni nez roguii cadro suga' reguxhtis. ²⁰ Che bidzunñajreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn̄ Israel. Cayujnreni bieje lo guejdxre. ²¹ Caguluiireni garenca leii nani digacdi gusoobnu sa'csi najcnu beñ roman.

²² Dxejcti bidxechnäj rebejn̄ Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäj̄lreni baar guideb tiejxh guiro'preni. ²³ Che gulujx gudinuxhreni Pabl näjza Silas, biäuren̄ neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl̄ guixhajgreni neñ latzguiib. Guyu' ni'reni neñ te baräjd ni sojb gueed te di guxun̄reni.

²⁵ Garolyääl̄ guninäjä Pabl näjza Silas Dios, guloj cayol̄reni dij ni rliä'p xpala'n Dios. Biejn di-ajg guiraa rebejn̄ ni yu' neñ latzguiib cayol̄reni. ²⁶ Chela gujc te xuduxh, basniib guideb latzgui-ibga. Bixal guiraa repuert, birucya' guiraa recaden̄, bixal ro' rebaräjd cadro naaz ni'reni. ²⁷ Che gubajñ guixhajg ni canäj latzguiib, bahuiini

naxhal latzguiib, gulääni spaad xtenni, te rljazni nugu'tni lagajc laani, sa'csi naani abadxuñ reni niâu neñ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas. ³⁰ Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudiibni dejtzreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäjä Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu beṇ roman. Batiäjṽreni baar detznu nez loj guiraa rebejṇ. Nicla niniabdiidxreni la yu' xhi dojl biennu. Basäuren i nuure neṇ latzguiib. Leii xten roman di gusaan gac rebeṇ roman si'c. Luxh ṇaj rlajzreni guslaareni nuure xhiga'tz. ¡Dinu guirii si'c! Lagajc laareni sujiädsṽlääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beṇ roman najc Pabl näjza Silas. ³⁹ Dxejcti biääd reguxhtis, gulääreni Pabl näjza Silas, gunabreni jiäjṽlajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neṇ latzguiib, huijreni roliiz Lidia. Balijdxreni rexpejṇ Jesucrist, gulecdxireni lajz rexpejṇ Jesucrist. Dxejc biunejzreni guejdxga.

17

Cadxechduxh guiraa rebeṇ Tesalónica

¹ Che gudejdreni reguedx Anfípolis, näjza guedx Apolonia, bidzujṇreni guedx Tesalónica cadre yu' te xquidoo rexpejṇ Israel. ² Ro'c basule' Pabl xtidx Dios si'c ni rujnpacni. Choṇ sabd, dxej ni rusilajz rexpejṇ Israel, basule'ni xtidx Dios lojreni. ³ Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: “Nanab ted Crist trabajwduxh, guetni, niluxh sibaṇsacni lo rebeṇgut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl nājza Silas. Nājza xhidalduxh beḡriegw nani rajḡ Dios nājza xhidajl reguna griegw ni sajcru huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii beḡploj, beḡlatsiaj, bejnreni biejy nez galäii. Biu'reni rolijz Jasón caguuilreni Pabl nājza Silas te cuääreni guiro'preni nez lo rebejn. ⁶ Niluxh che direni nidxäl Pabl nājza Silas, alga Jasón gulääreni nājza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujḡreni laadxnu, ⁷ luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis nājza rebejn diidxre, guyu'reni yärsia'. ⁹ Cua' reguxhtis meel lo Jasón nājza lo reexamigwni. Räjḡ reguxhtis sudedsacreni meelga che jii Pabl nājza Silas, jiunejzreni lo guejdxga. Dxejcti baslaareni Jasón nājza reexamigwni.

Chē guyu' Pabl con Silas guedx Berea

¹⁰ Che biu' guxhijḡ, baxhalgajc rexpejn Jesucrist Pabl nājza Silas ste guejdx ni laa Berea. Che bidzujḡreni guejdxga, biugajczeni xquidoo rexpejn Israel. ¹¹ Hueenru najc reben Berea loj reben Tesalónica, sa'csi rbaali lajzreni bacuadi-ajgreni xtidx Pabl ni guniini xcuent Jesucrist. Guixe-guixee bilreni guiitz cadro caj xtidx Dios te gucbeereni la gulii rextidx Pabl. ¹² Xhidajl rexpejn Israel nājza xhidajl beḡ griegw ni sajcru, gunaa sigajc niguii, huililajz xtidx Dios. ¹³ Che gucbee rexpejn Israel ni rbäjz guedx Tesalónica

caguluii Pabl xtidx Dios guedx Berea, biädreni guedx Berea. Che bidzujñreni lo guejdxga bejnreni biejoy ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jädgajczeni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Laḷ ni guläjz Pabl guedx Atenas, guyuduxhni yärsia' sa'csi bahuiini rajñ guiraa rebejn rebanäjbnani runchee lagajc bejn. ¹⁷ Ni'c neñ xquidooreni gudildiidx Pabl rexpejn Israel näjza rebenzajt ni rajñ Dios si'c rajñ rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biäd gaii bejn lojni. Yu' reni rolduxh guiitz ni bacuaa epicúreos, yu'za renani rolduxh guiitz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zarenı räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resurreccion”, ni säloj yälgubansac lo rebengut. ¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacheenu xhi diidx ruluiilu, ²⁰ sa'csi rujylu diidx nani dinu jiachee. Ni'cni bejn huen,

basule' diidxre loonu te gacbeenu xhi sälojreni —räjpreni.

²¹ Reben Atenas näjza rebenzijt ni yu' ro'c ru-teedreni redxej rniireni didxcoob lo sa'reni, o rucuadiajgreni didxcoob. Ni'cpac rchaglazjreni.

²² Galäii Areópago huisulii Pabl, räjpni lojreni:

—Colcuadiajg guejbtu, ben Atenas. Abahuiä xho randuxhtu xhidajl banäjb. ²³ Che siädsaä lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. ²⁵ Diza Diosre guiquiin chu gacnäjni sa'csi lagajc Diosre rudeed yäl nabajñ, yäl nadaan, näjza guiralii nani rquiin reben guedxliuj.

²⁶ Räjp Pabl:

—Guiralii reben guedxliuj najc rexagdoos tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. ²⁷ Benchee Dios guiraa reben guedxliuj te quiilreni Dios te chalilazjreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajñnu lo guedxliuj, runiidxni rsiaan lo guedxliuj, runiidxzani rdajlruxcäl nabajñnu lo guedxliuj. Laaca bacuaa rexpenñajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäjñ jiennu xhigab najc Dios si'c rebanäjb ni nac-chee pla't, o guij, o

yajg si'ctis ni runchee bejn rexpanäjbtu. ³⁰ Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn, ³¹ sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc beñsa'c. Rnili Jesucrist rediidx ni najc guliitis. Guläs Dios Jesucrist, baspañsacnini lo rebengut, te gacbeenu rajp Jesucrist yälrnibee lo guiraa recos.

³² Che biejn diajg rebejnğa gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinaljni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpejn Israel guedx Roma. Birinäj Aquila Priscila chäälni. Biriireni Italia, biädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' Pabl xtidx Dios

nen xquidoo rexpejn Israel. Rlajzni chalilajz rexpejn Israel najza beñ griegw ni digac xpejn Israel diidx ni rniini xcuent Jesucrist.

⁵ Dxejcti birii Silas najza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhal Dios.

⁶ Dxejc bidxechnäj rexpejn Israelni, guniyajzaren i xtiidxni. Dxejcti gubijb Pabl xhajbni si'c te seen diruni jiuren i, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpni.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpejn Israelni. Rolijzni sojb cuä' xquidoo rexpejn Israel. ⁸ Crisp, ni rnibee xquidoo Israel, huililajz xtidx Jesucrist. Huililajza guiraa reni rbäjz rolijzni. Xhidajlza beñ Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te gu-naazreni Pabl. Sanäreni Pabl jusgaad cadro yu' Galíon. ¹³ Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguhxtis —räjp Galíon.

¹⁶ Gunibee Galíon barilaagw resoldaad rexpejn Israel. ¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon huält huihuii Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, birini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcn si'c te seen yu' xhi diidx bia'nni con Dios. ¹⁹ Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni.

²¹ Badeedni xtixtios, räjpn lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. ²² Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost näjza lo rexpejn Jesucrist. Dxejc huijni guedx Antioquía xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluu Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huinärenini rolijzreni. Ro'c basule'rureni xtidx Dios nani gajdñi gan. ²⁷ Dxejc, sa'csi abejñ Apolos xhigab chääni reguejdx ni tre' nez Acaya, bacuaa rexpejn Jesucrist guiitz lo rexpejn Jesucrist ni yu' neñ reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidx Dios neñ reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii

xtidx Dios galoo basule'ni: “Jesús najc Crist nani cayunlojtu guxhal Dios.”

19

Guyu' Pabl guedx Éfeso

¹ La₁ ni guyu' Apolos guedx Corinto, huij Pabl xhidajl reguejdx neñ región Asia, dxejcti bidzujñni guedx Éfeso cadre bidxaagni gaii bejñ nani huililajz xtidx Dios. ² Gunabdiidx Pabl lojreni:

—Che huililajztu xtidx Dios, ¿la biädlajz Sprit D_{xan} xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit D_{xan} xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejñ.

⁴ Dxejcti räjp Pabl lojreni:

—Guliica bastiobnis Juan che basiejch lajz re-bejñ xtojñreni. Räjpza Juan lo rebejñ: “Cołchalilajz xtidx bejñ ni siääd detzä.” Bejñ ni basä'tni najc Jesucrist —räjp Pabl.

⁵ Che biejn diajg_{reni} rextidx Pabl birobnisreni te gachee rebejñ najcreni xpejñ Jesucrist. ⁶ Che batzuub Pabl ñaani yejcreni, biu' Sprit D_{xan} xten Dios neñ lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c choñ bäii, guixe-guixee gunii Pabl rextidx Dios, basule'ni xcuent xcälñibee Dios loj rebejñ

nen xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejn ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹ Gucnäj Dios Pabl bejn ni xhidajl dzunro, remilagwr. ¹² Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza reben dxab lastoo renani yu' ben dxab.

¹³ Dxejcti guyu' gaii ben Israel nani entis rcansaj, direni cuääz tejsi guejdx. Najcreni bejn ni rbää ben dxab lastoo rebejn. Bejn redee xhigabcoob, naareni cuääreni ben dxab xcuent laj Jesucrist, ni'cni räjpreni lo renani yu' ben dxab nen lastooni:

—Xcuent xcälrnibee Jesucrist nani ruluii Pabl rnibeenu guiriilu nen lastoo bejn ga —räjpreni.

¹⁴ Guyu' gajdz xi'n Esceva, te ben Israel, nani saj cru lo rebixhojz. Rujn redee dzuun rbääreni reben dxab nen lastoo rebejn. ¹⁵ Che gunii rexi'n Esceva loj ben dxabga si'c, räjp ben dxab ni yu' nen lastoo bejn ga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbleä la'tu.

16 Dxejcti bixa't niguui nani yu' beṇdxab nen lastooni yejc rexi'n Esceva, gudinduxhnireni, basälta'nireni, batiäjsni xhajbreni. Dxejcti baxunreni biriireni neṇ yu'ga, bidxälguijdxzareni biräsya' xhajbreni. 17 Dxejcti guiraa reben Éfeso, rexpejn Israel sigajc beṇ griegw, gucbee xho bennäj beṇdxab reniguiiga. Bidxebduxh rebejnğa, luxh huä'p xpala'n Jesucrist.

18 Xhidalduxh reni huililajz xtidx Dios biäd lo rexpejn Jesucrist. Cacäjpreni guiraa recos xhet laadi nani rujnreni. 19 Xhidajl reni najc bidxaa biädnä reguijtz cadre caj yälñajn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mil melpla't. 20 Xhidalduxh rebejn huililajz xtidx Dios. Batijp Dios lastoo rexpejnñi. Gulä'p guiraareni xpala'n Dios.

21 Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

22 Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxebduxh reben Éfeso

23 Neṇ redxejga, guyuduxh rebejn yärsia' sa'csi baluii Pabl xtidx Dios. Direni nichaglajz care'ch xtidx Dios. 24 Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel

ro'c. ²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxni. Räjpni lo re-bejn: “Xhet diosdi najc reni racchee con ñaa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. ²⁷ Ni'c ries nitloj xtzuunnu palga diru bejn sii ni'ch ni riencheenu. Luxh rieszä diru bejn jädgajn Diana neñ xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcro, niluxh palga diru rebejn gan Diana, pet sinitlojni —räjpni.

²⁸ Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

²⁹ Guideb guejdx guyu' biejy. Dxejcti ruxunreni bidxagsa'reni lo yuj cadro rajc rexjuntreni. Gu-naazreni Gayo näjza Aristarco, ben Macedonia ni rinajl Pabl. ³⁰ Rlajz Pabl niu'ni cadro bidxagsa' re-bejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäálu cadro nadxagsa' rebejnğa —räjpreni.

³² Lo rebejn ni re'ga, yu' reni rbedxa' tej di-idx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. ³³ Dxejcti gulää rexpejn Israel te dade'ni laa Alejandro lo reben xhidaalga, te guini-ini lo rebejn. Dxejcti basääbni ñaani lo rebejn te gac

dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. ³⁴ Niluxh che gucbee rebejn najc Alejandro bejn Israel, tiop or guredxaduxhreni, räjpreni:

—Sacduxh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu bejn Éfeso, caguidxäj] te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj.

³⁶ Sa'csi rediidxre najc gulii, nungäj] cuedxitu, na'c guntu recos guiidxre. ³⁷ ¿Xhicuent gunaaztu reniguii ni siädnaätu ree? Direni gac gubaan ni rbajn recos guidoo, dizareni niniyaj xtiosnu.

³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

³⁹ Niluxh palga yu' xhi stee, nanab gac te junt xte reben guejdx si'c ni caj lo xleinu. ⁴⁰ Ries jii xquejnu lo gubier, naareni bidojpnu te guidxagdilu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. ² Guiraa reguejdxga cadre gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³ Che bidzujñni Grecia, bia'nni ro'c chon bäii. Dxejcti niu' Pabl nen barcw te nijni reguejdx Siria. Niluxh che biejn diajgni cabáz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pirios, te beñ guedx Berea; näj Aristarco näjza Secondo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nen barcw te sonnu nez guedx Troas. Gaii dxej gusaanu nen barcw, dxejc bidzunu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuni si'cti garolyäälli. ⁸ Yu' cadre bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo

rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. ¹⁰ Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni.

¹² Xhetliidiru rajcdi bi'nga nani gubañsac, nani guläs Pabl. Bibalazduxhreni, huisa'nrenini rolizjni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiini guejdxga, ro'cli jiu'ni neñ barcw. ¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunu guedx Samos. Guedx Trogilio basilaaznu. Che bara stee yääl, bidzunu guedx Mileto. ¹⁶ Di rlajz Pabl jiu'nu guedx Éfeso, diza rlajzni chunu Asía xchej, sa'csi riojb lajzni guidzunu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

17 Che guyu'nu guedx Mileto, baxhaḷ Pabl diidx lo rexpejn Jesucrist ni yu' guedx Éfeso, gurejdxni reni rnibee. 18 Che bidzujnreni lo guejdxga, räjp Pabl lojreni:

—Lagajc la'tu najntu xho nabaṇä nez lojtu, dx-ejli ni bidzunä, nabaṇnäã Dios. 19 La'tu najntu xho runä xtzuun Jesucrist guixe-guixee, guideb xcälṇadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlajz rexpejn Israel nugu't narä, gudedä trabajw-duxh. 20 La'tu najntu xho baluiä lojtu guiralii rextidx Dios ni najc huen par la'tu. Che nadx-agsa'tu baluiä xtidx Dios lojtu, näjza rolijz cade tejtü huiluiä xtidx Dios lojtu. 21 Basule'ä xtidx Dios lo rexpejn Israel näjza lo rebenzijt ni di gac xpejn Israel. Räpä lojreni nanab gusiechljazreni, gusa'nreni xtojḷreni, nanab chalilajzreni xtidx Jesucrist te gudzucaj Dios xtojḷreni. 22 Naj cadedä te laad guejdx xtentu, sia'ä guedx Jerusalén, sa'csi caguxhaḷ Sprit Dxan xten Dios narä cha'ä guedx Jerusalén. Dina ganä xhi sacä ro'c. 23 Niluxh nanä cade tej reguejdx cadre rdedä rnii Sprit Dxan xten Dios loä sidedä trabajwduxh, siäuä neṇ latzguiib guedx Jerusalén. 24 Niluxh dina guidxebä, dizana chanälazduxhä xcälṇabaṇätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojḷreni palga chalilajzreni xtidx Dios xcuent Jesucrist —räjp Pabl.

25 Räjpszani:

—Naj agucbeä dirutu fisac loä, la'tu nani basule'ä xcälṇrnibee Dios lojtu. 26 Rniliäpac lojtu,

xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibannu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruiz te gac gudzucaj Dios xtojlni. ²⁹ Anancheä che rutdiru narä, siääd bejn nani rlajz chalilajztu ste'ca diidx, na'c chalilajztu niclaza jiutu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlneni redee ni rusguee. ³¹ Colhuui te di gusgueereni la'tu. Di jiäl-lajztu chon ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjpza Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios bensa'c, nani najc xpejnni. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con naä te bio' xhi gudaunää rexamigwä. ³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpni.

³⁶ Che gulujx gunii Pabl rediidxga, bazuxhibnäjni rebejnga, guredx-gunabni lo Dios.

³⁷ Dxejcti ronduxh guiraareni gudääzreni guejn

Pabl, bachagro'renini. ³⁸ Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'ntinu rexpejn̄ Jesucrist ro'c, biu'nu neñ barcw, sionnu te lii nejk lo yuj ni laa Cos, ni tre' lo nisdoo. Che bara yääl, bidzun̄nu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara. ² Che bidzun̄nu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. ³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzun̄nu guedx Tiro cadre gule'creni cargw ni nuu barcwga. ⁴ Ro'c bidxälnu rexpejn̄ Jesucrist. Biannänureni gajdz dxej. Baluii Sprit Dxi xten Diosreni te guniireni lo Pabl, räjpreni:

—Na'c chäälgu guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhijbnu te guredxgunabnu lo Dios.

⁶ Che abazadiidxn̄u sa'nu, nuure biu'nu neñ barcw, biädla laareni gubisacreni rolijzreni.

⁷ Biriitinu guedx Tiro. Che bidzun̄nu ro' guedx Tolemaida, gulujx xpiajnu biäjt̄nu neñ barcw. Dxejc biohuiinu rexpejn̄ Jesucrist ni yu' guejdxga, biannänureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzun̄nu guejdxga, bionnu rolijz Felipe, te dade' ni rusule'xtidx Dios lo bejn̄. Felipe gujc tej lo gajdz niguii

nani gudis xhi gudajw rexpén Jesucrist nani xhet rajpdi guedx Jerusalén. Rolijzni huijia'nnu. ⁹ Yu' tajp xindxapxteb Felipe. Dios badeed diidx guini-ireni lo bejn. ¹⁰ Xhidajl dxej guläjznu roliz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejnni te guiniini xtidx Dios.

¹¹ Che bidzujnni loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxa xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te guteedrenini ladznaa rebenzajt.”

¹² Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä neñ latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlajztis Dios.

¹⁵ Che gudejd redxejga, bilucheenu rehxixtenu, biriinu guejdxga, sontinu guedx Jerusalén.

¹⁶ Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c gulääznu.

Huihuii Pabl Jacob

17 Che bidzunnu guedx Jerusalén, bibalazduhx rexpejn Jesucrist sa'csi siopnu ro'c. 18 Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. 19 Dxejc gudääz Pablreni, bijni diidx xcuent tebgaj redzuun nani badeed Dios bejnne che gyunäjni rebenzijt nani di gac xpejn Israel, te biejn diajgreni xtidx Dios. 20 Che biejn diajgreni xtidx Pabl, gulä'preni xpala'n Dios, räjpzareni lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. 21 Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzijt, ruliidxlureni na'c gusalreni bee rexi'nreni, na'cza chazanäjrrureni rexcostumbrnu. 22 ¿Xhini'c jiennu? Siejn diajgreni abidzujnlu ree, dxejc suchagsa'reni te jiädreni lojlu. 23 Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. 24 Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejcti si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerenei laaca rusoooblu xleii toMoisés. 25 Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjt nani di

gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiädnä tejgareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siäd Asia lo Pabl nen guidoroga. Gunaazreni Pabl, dxejcti gusloj cayujnreni biejy, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nure! ¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjruren i xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree bejn griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siäd guedx Éfeso. Naj cayujnreni xhigab laa niguiiga ni siädnä Pabl nen xquidoro rexpejn Israel.

³⁰ Guideb guejdxga guyu' yärsia', bire' benguixhuj, bixa'treni yejc Pabl, gunaazrenini, gudobxhaxhreni Pabl, gulägajcneni nen guidoroga. Biägajc repuetro xten guidoro. ³¹ La! ni cayujnreni xhigab ju'trenini, yu' chu huiye'tz lo nani rnibee resoladaad ni caya'p guejdxga, räjpreni: —Cayajc te bieiduxh nen guejdxre.

³² Guredxgajc comandant resoladaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoladaad,

guläjz caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni.

³⁵ Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlajzreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl nen yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxaä! ³⁸ An dilu gac niguii ni siädación Egipto, nani gudilnäj gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te bejn Israel, te bejn Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu beṅgool, guejbtu resa'ä, näjza la'tu dade'. Gucuadiajgtu rextidxä —räjpnī.

² Che biejn diajgreni caniini didx hebreo, dxidujru guzuj rebejn. Räjpn Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj. ⁴ Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguib. Basäuäreni nen latzguiib.

⁵ Bixhojz ni sajcrū näjza guiraa rebṅgool ni sajcrū nen xquidootu, sajcrū guinii xhini'c benä. Laareni baniidxreni guijt loä. Ni'c huinäa lo rexpejn Israel ni yu' guedx Damasco, cadre hua'a te nini-azä rebejn nani huililajz xtidx Jesucrist. Benä xhigab jädnääreni guedx Jerusalén te jäüreni nen latzguiib, te gusacsireni rebejn ga.

*Gunii Pabl xho huililajzni xtidx Jesucrist
(Hch. 9:1-19; 26:12-18)*

⁶ Räjpzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siäd bajlga. ⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, ¿hicuent rusacsílu narä näjza rexpenä?” najni. ⁸ Dxejcti räpä lojni: “¿Chuluj, Dad?” Najni loä: “Narä nacä Jesucrist ni siäd Nasare't, nani cagusacsíduxhlu.” ⁹ Rebejn ni sanää bahuiloj bajlga, bidxebreni, niluxh di diajgreni niejn xse'

nani gunii loä. ¹⁰ Răpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” ¹¹ Bastujxh bajlga loä, diru loä niēn, ni'cni gunaaz resa'ä naä, sontinu guedx Damasco.

¹² Răjp Pabl:

—Guejdxga guläjz te niguii ni laa Ananías. Ru-soobni guiraa releii xten toMoisés. Guiraa rexpejn Israel rnii nadalajz lo dade'ga. Biääd Ananías loä. ¹³ Cuä'ä guzujni najni loä: “¿Saulo, betzä, bahuisac!” Lagajc dxejc biajc loä, bahuiä lojni. ¹⁴ Naj Ananías loä: “Xtios retoxtadgolloonu agulelu. Gule Dios luj te jiejn diajglu rediidx ni rlanjni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵ Loj guiraa bejn susule'lu guiraa ni bahuiilu nājza nani biejn diajglu. ¹⁶ ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluini xtidx Dios lo rebenzajt

¹⁷ Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Laḷ ni cabedx-canabä lo Dios, astoo gunixcalä, ¹⁸ dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” ¹⁹ Narä răpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguiib. ²⁰ Che bacuaareni guij yejc Esteban nani gunii xtiidxlu, ro'c guzuä, cuäbä

bejnreni si'c. Go'pä xhajb xten renani bagu't Esteban laḷ ni bacuaareni guij.” ²¹ Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

Bia'n Pabl neḷ rolizro xten resoldaad

²² Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colḡu't niguiiga. Di nunyäjḷ guibajḷruni.

²³ Sanuutis cabedxa'reni. Gulääreni xcamangwreni, cacuaazareni yuyolḷ jiaa. ²⁴ Dxejcti gunibee comandant lo resoldaad, räjpni:

—Colchanä Pabl neḷ yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

²⁵ Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beḷ roman che gajdtu gacbee xhi dojlḷ bejnni, ä? Et si'cti caj lo xleiilu.

²⁶ Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beḷ roman.

²⁷ Biädguxuḷ comandant lo Pabl, räjpni:

—¿La gulii najclu beḷ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beḷ roman.

Dxejcti räjp Pabl lojni:

—Narä che goḷäli nacä beḷ roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', ñaani. Che biejnza diajg comandant najc Pabl beñ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rlazj comandant gacbeeni xhicuent rlazj rexpejn Israel ju't Pabl. Ni'c gunibeeni jääd rebixhojz ni sajcro näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laļ ni räjpni lojreni:

—Nará gusule'ä tiop diidx lo guejbtu, beñ Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcro, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beñguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gacbee laa bixhojz ni sajcro xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcro, sa'csi nanä agunii Dios: “Na'c guiniyajlu

reni rnibee xpejnlu.” Si'c caj lo guijt̃z ni bacuaa reni gunii xtid̃x Dios.

⁶ Gucbee Pabl tiop cuaa najc reni tre' ro'c. Yu' reni najc beṅ saducee, yu'za reni najc beṅ farisee. Dxejc guredxa' Pabl räjpni lojreni:

—Sa'ä, narä nacä te beṅ farisee, xi'nza te beṅ farisee narä. Rililazä sibaṅsac beṅ lo rebeṅgut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' re-farisee, sgala' resaducee. ⁸ Di lajz resaducee chalii sibaṅsac rebeṅgut, dizareni chalilajz yu' rexangl Dios, dizareni chalilajz yu' aim xten beṅ. Niluxh refarisee rililajz guiraa rediid̃xga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac beṅguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcn̄i. Dxejcti gunibeeni biäj̄t resoldaad cadro suga' Pabl. Guideb xtijpreni guläärene Pabl galäii rebejnga huinäsaereni neṅ yuro xtenreni.

¹¹ Che biu' guxhij̄n, baluiloj Jesucrist lo Pabl, guzujni cu'ä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtid̃xä guedx Jerusalén, sigajcza nanab gusule'lu xtid̃xä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidaunu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujñreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidaudinu palga dinu guigutxгаа Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jädnä comandant Pabl ree, nuure sugu'tnuni lo nezyuj che gajdni guidzujñ ree —räjp reniguiiga.

¹⁶ Niluxh biejn diajg xi'n bisiajn Pabl cabäzXHiga'tz reniguiiga te ju'treni Pabl, huijni royuro xten resoldaad. Che bidzujñni, biu'ni räjpni lo Pabl rediidx ni biejn diajni. ¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu nen yuro xten resoldaad, gunab loä jädnälaa bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinänini te laad cadro rut jiejnri diajni xtiidxreni, dxejc räjpni lojni:

—¿Xhini'c rlanjlu guiniilu loä?

²⁰ Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Suijnireni si'c ni rlanj jiejnru diajgreni diidx xcuent Pabl. ²¹ Na'c chalilajz guejblu xtiidxreni. Tiu

niguii sibäz̄xhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxгаа Pabl. Naj cabäjtisreni guxhaḷ guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolijzni, räp̄xgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpni lojreni:

—Colgutoj̄p tiop gayuu soldaad, chää guedx Cesarea nājza gayoḅbitzuu soldaad ni bijb cabaii, nājza tiop gayuu soldaad ni ca' spaad. Rcagaa guxhij̄n guiriireni ree. ²⁴ Colquiil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

²⁵ Dxejcti bejn comandant te guijt̄z chanäreni lo gubernadoor.

²⁶ Loj guijt̄zga rnii scree: “Gubernador Pels, nani sacduxh. Narä, Claudio Lisias, ruxhaḷä xtixtios lo guejblu. ²⁷ Rediidxre rucuaä lo guejblu. Gunaaz rexpej̄n Israel niguiire, luxh paru dina nidz̄uḅga'cä con resoldaad, nugu'trenini. Che gucebeä najcni beḅ roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpej̄n Israel ni rnibee guidoro. ²⁹ Dxejc gucebeä requej ni rbe'creni najc ganax xcuent leii xtenreni, niluxh xhet bejndini te nungäjl̄ guetni, niclazä nanab jiäuni neḅ latzguiib. ³⁰ Che baxhaḷreni diidx loä cabäz̄xhiga'tz rexpej̄n Israelni te

ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniä lo guejblu", si'c caj lo guijtzt ni bejn comandant.

³¹ Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujn redee Cesarea, badeedreni xquijtzt comandant lo gubernadoor, huinäzarenini Pabl lojni te biembeenini. ³⁴ Che gulujx bilni guijtztga, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, ³⁵ räjpni lo Pabl:

—Guidzujnsi rexpejn Israel ni cadxechnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujn Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujn guejblu. ³ Xquixtiosduxh guejblu, gubernadoor Pels, xcuent guiraa redzunsac ni rujn guejblu guira nejz. ⁴ Luxh na'cru gusieednu guejblu,

gucuadiaglaa guejblu tiop diidx. ⁵ Agucbeenu xho najc niguiire. Ben_guidxduxhni. Cadrotis rijni rujnni bie_jy lo rexpej_n Israel. Laani rnibee te cuaa ni laa nasaren_n, nalajznu rebej_n nani rililajz xtidx Jesucrist ni biääd guedx Nasare't. ⁶ Rlajzlini nuxhi_nni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijznu. ⁷ Niluxh bidzuj_n comandant Lisias näjza resoldaad. Diptis badzucajreni niguiiga ladz_naanu. ⁸ Laani gunibeeni lo guejblu jiääd reni rbe'c xquej_ni. Naj lagajc guejblu saj_c guiniabdiidx lojni te gacbee guejblu gulii guiraa requej nani rbe'cnu xcuentni —räjp Tértulo.

⁹ Dxejcti guiraa rexpej_n Israel ni suga' ro'c räjp guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—. ¹¹ Gutzbitio'p dxejtis bidzunä guedx Jerusalén te saganä Dios. Najn rebej_n xhi dxej biu'ä Jerusalén, guyasi guniidxreni diidx. ¹² Nicla tej dina nichagdilä bej_n ne_n guidoro. Nicla tej dina niunä bie_jy ne_n reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu gulii najc xtiidxreni. ¹⁴ Rniliäpac lo guejblu: Ra_nä Xtios retoxtadgoldoonu. Jesucrist baluii xho ga_nsa'cnu Dios. Rililazä rextiidxni. Xhidalduxh rexpej_n Israel rniyaj xho basule' Jesucrist ga_n bej_n Dios. Ruzobä guiraali releii

xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibañsac rebengut, rebenguijdx sigajc rebensa'c. ¹⁶ Ni'cni racbeä laaca nabañä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

¹⁷ Räjpn Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸ Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza biejydi cayunä. ¹⁹ ¿Con rebejnnga naj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjpn Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi nagne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiäädli comandant Lisias dxejc gunä yälguxhtis —räjpn Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlaajtisni gunni. Na'cza gudxojnni jiääd reexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist.

²⁵ Gunii Pabl xho nanab guibaṅsa'c bejñ nez loj Dios si'c ni gunibee Dios guibajñ bejñ. Nanabza gacbee bejñ na'c gun bejñ cos guijdx, sa'csi sidzujñ dxej gac Dios juejz loj guiraa rebejñ te fini xhi bejñreni. Racsesli Pels tant bidxejbni biejn diajgni diidxga. Räjpn̄i lo Pabl:

—Huij ñaj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini.

²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcni gubernadorcoob. Niluxh Pels rlanj chanälajz rexpejñ Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcni gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén. ² Che bidzujñni guejdxga, rebixhojz nani rnibee näjza reniguii ni sajcro lo rexpejñ Israel biääd lo Festo. Gusloj cabe'creni xquej Pabl lojni. Gun-abduxhreni lo Festo ³ sa'csi rlanjreni gunni te huen laareni, guinibeeni jiädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezuj.

⁴ Dxejcti räjp Festo lojreni:

—Suniaü Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajcro lo sa'tu

guedx Cesarea, te ro'c cue'creni xquej Pabl loä, don la yu' xhi dzunguijdx bejnni —räjpni.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. ⁷ Che bidzujn Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlajzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjł cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel. ¹¹ Palga nacä te benguijdx, o palga yu' xhi latsiaj benä te nungäjł guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladznäareni. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäálu loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujn reii Agripa näjza chäälni Berenice guedx Cesarea. Biädhuiireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. ¹⁶ Röpä lojreni: “Di leii xten nación roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejca niguiiga diidx xcuent requej, te guiniini la guliireni.” ¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc guinibeä huixiireni Pabl guzuj nez loä. ¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl. ¹⁹ Alga cadilnäjrenini xcuent xleiireni, xcostumbrreni. Guniizarenini xcuent te niguii ni laa Jesucrist. Agujtni, niluxh canii Pabl gubansacni lo rebengut. ²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni la_l ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpni.

²³ Che bara yääl, biääd Agripa näjza Berenice, luxh sucheduxhreni. Näjza recapitán ni sajcrú näjza rebejn ni sajcrú lo guejdxga biu'reni nen yuro xten Festo. Dxejc gunibee Festo biääd Pabl.

²⁴ Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadiajg. Colhúi lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni. ²⁵ Niluxh narä rchaloä xhet bejndini te nungäj̄l guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guiitz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiiniini xtiidxni lo guiraanu, sidxälä xhi diidx gucuaä lo guiitz ni chää lo César. ²⁷ Narä runä xhigab di nungäj̄l guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl ñaani, gusloj cagusule'ni diidx lojreni. Räjpni:

² —Reii Agripa, rbalazduxhä sa'csi sajç gusule'ä diidx lo guejblu, sa'csi ñaj suze'cä diidx xcuent

guiraa requej ni gule'c rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextidxä.

⁴ Räjpa Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleinu si'cni rililajznu. ⁶ Naj suga'a ree, rlajzreni jiäuä sa'csi rililazä diidx nani bia'n Dios con retoxtadgoldoonu. ⁷ Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxeyyäl. Naj rniliä lo guejblu rei Agripa, sa'csi rililazä siliäs Dios guiraa rebengut te guibañsacreni, ni'cni rlajzreni gusäureni narä. ⁸ Palga abejn Dios xhigab guiliäsni guiraa rebengut te guibañsacreni, ¿xhicuent di lajztu chalii xtidx Dios?

⁹ Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni neñ latzguiib. ¹⁰ Guiraa recosre benäza guedx Jerusalén. Baniidx rebixhojz ni rnibee guiitz loä te basäuä rexpejn Jesucrist neñ latzguiib. Che biäureni neñ latzguiib, narä gule'cä xquejreni te gujtreni. ¹¹ Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijt te ro'c huisacsíä rexpejn Jesucrist.

(Hch. 9:1-19; 22:6-16)

¹² Rājpa Pabl:

—Ni'c sa'a nez guedx Damasco, ca'a guijt_z ni baniid_x rebixhoj_z ni rnibee. ¹³ Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpeñä? Che rusacsílu narä, lagajc luj rdejdlu trabajw, si'c te gon ni rucuani' yejc garu'ch.” ¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. ¹⁶ Huistie, gusulii. Narä baluiloä lojlu sa'csi rlazä gaclu te xpeñä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. ¹⁷ Naj suxhalälulu loj rexpejn Israel näjza lo rebenzijt nani di gac xpejn Israel. Che gusacsí rexpejn Israel näjza rebenzijt luj, sacnäduxhälulu, te di ju'treni luj. ¹⁸ Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Beñdxab ni rnibee reben_zxab, sa'csi susoobreni xtidx Dios. Che chalilajzreni rextidxä, sudzucaj Dios xtojlni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä.”

¹⁹ Rājpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgää xtiid_xni lo reben Damasco. Räpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn abasiechlajztu,

arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. ²¹ Sa'csi benä si'c, gunaaz rexpejn Israel narä neñ guidoro, rlajzreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijt z nani bacuaa to Moisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidejd Crist trabajwduxh, sugu'treni. Niluxh sa'csi ganiddoo laani guibañsacni lo rebeñgut, ganiddooza laani suluiini loj rexpejn Israel näjza loj guiraa rebenzijt guliipac xtidx Dios, sibañsac bejn lo rebeñgut, si'c ni guniini galooli.

Di Agripa nililajz xtidx Jesucrist

²⁴ Lañ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijt z ni'c cayajc yejclu.

²⁵ Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. ²⁶ Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpeñ Dios.

²⁹ Räj̄p Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räj̄p Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni. ³¹ Che gubigreni stelaad, räj̄preni lo sa'reni:

—Niguiire xhet bejndini te guetni, xhetza bejndini te jiäuni.

³² Dxejcti räj̄p Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹ Basoobtireni dxej ni niu'nu nen barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw

lo nisdoo, bideednu stelaad Chipre, yuj ni tre' lo nisdoo, sa'csi sääb te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu neñ barcw, bideednu xnisdoo reguedx Cilia näjza xnisdoo reguedx Panfilia, te bidzunnu ro' guedx Mira xten Licia. ⁶ Ro'c bidxäjł capitán xten resoldaad stee barcw ni siääd guedx Alejandría. Agojł chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadre guxii sääb bej. Gajxh ro'c tre' guedx Lasea. ⁹ Agujc balti dxej caya-claanu, luxh agudejdza dxej ni rucua'n rexpejn Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajł bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajł, rajpreni.

13 Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. 14 Niluxh di niaclaa gusloj te nisguipeduxh birii nez redajn xten Creta. 15 Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. 16 Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu nen barcw. 17 Che basälnu canuu nen barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' nen nisdoo. Ni'c guläjtreni ladro ni rniaaz bej te rusajni barcw, gudixhreni lajdga nen barcw. Sanäti beduxhga barcw cadrotis rlajzni. 18 Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. 19 Ni riojn dxej, lagajc laareni basälreni lo nisdoo guiraa xtrast barcw. 20 Che agujc balti dxej niäu lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtnu. 21 Xchero rut rlajzdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. 22 Niluxh colcuedcxi lastootu. Niclatej bejn ni siääd lo barcw di guet. Barcwtis sinitloj. 23 Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, 24 najni loä: “Na'c guidxejblu Pabl. Nanabpac

chäälu lo rei César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet", najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj, ²⁸ ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jiät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jiät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlanjreni malaii jianijga lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlanjreni guxuñreni guidon la sajc guidzujñreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuga. ³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu

gau. ³⁴ Naj coltajw te gac guixoo^obtu lo nisdoo. Na'c guntu xhigab guettu, nicla tej xquidxejct^u di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dx-
ejc gula'nini, gusloj cayajwnini. ³⁶ Dxejc bibaa-
lajzreni, näjza laareni gusloj cayajwreni. ³⁷ Nuunu
najcnu tiop gayuu gayonbitzubixho'p bejn ni yu'
nen barcwga. ³⁸ Che agujc gudajwreni, basälreni
triuu lo nisdoo te bicharu barcw.

³⁹ Che bianisac, direni niembee yujga, niluxh
bahuiireni cadro rdzujn te gueubäj ro' nisdoo
cadro yu' xhiroob yujxh ro' nisdoo^{ga}. Rlajzreni
nusu'reni barcw ro'c. ⁴⁰ Dxejcti baslaareni guidap
guench guiib ni naaz barcw, bia'nreni guideb
caden nen nisdoo, baxheczareni yajg ni ruzaj
barcw, guläszareni ladro nez delant barcw te
bala^{naa} bej barcw. Badzuréreni barcw sääreni nez
ro' nisdoo. ⁴¹ Sas biu'reni te lajt cadro rdxagsa'
tiop cuaa nis. Ro'c huilaj yejc barcw nen yujxh nen
nisdoo, digacdiru guiniibni. Dxejcti gusloj cabijl
dejtz barcw sa'csi sanuutis caguijn nisdoo detz
barcw. ⁴² Dxejcti rlajz resoldaad nugu't repres
te di guixoobreni lo nis guxunreni. ⁴³ Niluxh di
rlajz capitán xten resoldaad guet Pabl, ni'c dini
nusaan nugu't resoldaad repres. Gunibee capitán
ganiddoo renani rajc rxoob lo nis guitiäjs lo nisdoo
te guidzujnreni lo yujxh. ⁴⁴ Dxejcti birinajl rebejn
ni digacdi guixoob lo nis, naazreni barajd o te
la' yajg ni gula' detz barcw. Si'c gujc bidzujn
guiragajc rebejn lo yujxh ro' nisdoo. Nadaanreni
bidzujnreni lo yujxhga.

28

Bidzujn Pabl lo yuj ni laa Malta ni re' lo nisdoo

¹ Che bidzujn nu lo yuj ni tre' lo nisdoo, biem-beenu yujga najc ni laa Malta. ² Gucnäj rebejn ro'c nuure, gule'creni guiboo bahuiireni nuure sa'csi cayacnalduh, cayajbza nisguij. ³ Ca' Pabl te dääz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. ⁴ Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtni naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶ Dxejc reben ro'c cabäjz fiireni la sisiägüij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni choñ dxej. Huenduxh gujc dade'ga, baniidxni guiraa ni biquiinnu. ⁸ Naga' xtad Publio cayacxhuuni, yu'ni xliaa, cayajczani yobrejn. Huihui Pabl ni. Guredx-gunab Pabl lo Dios, dxejc batzuub Pabl naani yejcn i, basiacgajcnini. ⁹ Che gucbee reben guejdxga abasiajcn i beñ racxhuuga, bidzunäjreni beñ racxhuu lo Pabl, basiajc Pabl guiraareni. ¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu nen barcw.

Bidzujn Pabl guedx Roma

¹¹ Agujc chon bäīīī yu'nu ro'c che biu'nu nen te barcw ni siääd Alejandría. Lagajc ro'c bateed barcwga rebäinaj̄l̄ che rsiäb beduxh. Yejc barcwga caj tiop figuur xten tiop biuux ni laa Cástor nájza Pólux, rexingancua'ch dios ni laa Zeus. ¹² Biriinu Malta sonnu nen̄ barcw nez guedx Siracusa. Ro'c bia'nnu chon̄ dxej. ¹³ Dxejcti biusacnu nen̄ barcw, sonnu lo nisdoo cheni bidzun̄linu guejdx ni laa Regio. Che bara yääl, gubi' te bej birii lad sur. Biusacnu nen̄ barcw. Bara yääl bidzun̄nu guedx Puteoli. ¹⁴ Ro'c bidxaagnu gaiī xpejn̄ Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che gucbee rexpejn̄ Jesucrist ni yu' guedx Roma siopsaanu nez Roma, biäädreni guedx Foro de Apio nájza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladzn̄aa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluii Pabl xtidx Dios lo reben̄ Roma

¹⁷ Che gudejd chon̄ dxej, gurejdx Pabl reni rnibee lo rexpejn̄ Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn̄ Israel, dizana nibälazä xleii toMoisés. Niluxh basäuren̄i narä nen̄ latzguiib guedx Jerusalén, dxejcti bateedren̄i narä ladzn̄aa reroman. ¹⁸ Che biejn̄ diajgreni

xtidxä, rlanj reguxhtis roman nusläa narä sa'csi xhet benädi te nugu'treni narä. ¹⁹ Niluxh naaddi rexpejn Israel gusläareni narä, gunabätis lojpac rei César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebenḡut, ni'c nalibä cadenre.

²¹ Dxejcti räjpreni lojni:

—Nicla tej guijtz gajd reguxhtis xten reguedx Judea guxhal loonu xcuentlu, gajdza rexpejn nu ni bidzujn ree jiädsa'n diidx xhet laadi bejnlu. ²² Rlanjnu jiejn diajgnu xtiidxlu, don xhi naalu, sa'csi racheenu xhidajl lajt rniyajreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujn dxejga, bidxagsa' xhidalduxh bejn nen yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con redidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jiäd. ²⁴ Yu'reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxaan xten Dios rediidxre guniini, räjpni lo rextad-goldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejn_{re} sa'csi di rlanjzeni chalilajzeni xtidxä.

Direni cuadiajg xtidxä sa'csi di rlanjzeni jiejn diajg_{re}ni diidx ni guliipac.

Rusäuzareni balojzeni te di fiireni, te di lajzeni chalii.

Ni'cni direni gusiechlajzeni te gusaan gunreni dojl_{re} te gudzucaj Dios xtoj_{re}ni.

²⁸ Räjp Pabl lojzeni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzeni, te gudzucaj Dios xtoj_{re}ni. Rniliäpac lojtu, sililajzeni rextidx Dios.

²⁹ Che gulujx gunii Pabl rediidxga lojzeni, ensilaareni gusloj cadxagdijl sa'reni la_{re} ni sääreni.

³⁰ Tiop ijz guläjz Pabl guejdxga nen_{re} yu' ni cualaani. Biuni guiralii rebejn ni biääd rolijzni.

³¹ Lo guiraa rebejn_{ga} basule'ni xho rnibee Dios lojzeni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

5cff1274-8dc3-5398-a94d-f6033bb363c9